



正

正

正

鑿

鑿

鑿

卷之五
氏墨戲

正誼堂詩集

五言絕句

題啟母石

詎便能呱啟神奇說自誣諸峯千古侍片石至今孤

贈王將軍

早歲平關隴歸來奏凱歌相逢夾轂問家世本三河

泛漢陽月湖

一片湖光白如浮大別山武昌絲管急流入水潺潺

碣石宮

苦乏縱橫術談天策最高便教瀛海上碣石起波濤

漸離臺

擊筑遊燕市悲哉高漸離至今臺畔過空繫酒人思

黃金臺

燕昭曾市駿郭隗便登臺策得驂騑過如何歸去來

正誼堂詩集五言絕句一

正誼堂詩集
七言絕句一

從軍行

絕塞天高白草秋
可憐蘆管動邊愁
將軍獨擁胭脂女
明日平羌

拜徹侯

涼州詞
青海何曾戰氣平
塞門斜日照懸旌
羽林健將封侯晚
痛飲葡萄

去射生

吳宮詞

采蓮越女唱初低
向晚芳洲畫艇齊
猶倚君王凝望眼
波光爭似

浣紗溪

楚宮詞

一幸高唐暮復朝
章華臺畔柳蕭條
相思且自加餐飯
莫信君王
愛細腰

秦宮詞

守宮砂在幾時銷夜卷衣裳仙路遙知道樓居能引鳳早隨公主
學吹簫

魏宮詞二首

銅雀高臺倚鄴雲香塵細雨自紛紛總惟一望歌聲起不信西陵
尚忍聞

珠簾五彩照香茵玳瑁樓邊近紫宸莫誦陳王東路賦思量誰是

洛川神

游仙曲二首

名芝釀酒紫煙飄侍讌都攜碧玉簫阿母悔從王滿飲當筵莫唱

白雲謠

子晉曾聞駕白雲諸公偶語尚紛紛空傳緱氏山頭信天上吹笙
那得聞

秋暮同諸子賦得宮怨二首

正是君王夜飲時蛾眉修短未曾知長門休買相如賦留得黃金
賂畫師

能工樂府漫相誇依舊當年臂上砂縱抱雲和彈不得御前新曲
愛琵琶

閨怨二首

流蘇空繫合歡牀夫婿長征妾斷腸留得當時臨別淚經年不忍
浣衣裳

玳瑁簾空玉筍流銀鐙挑徹自言愁可憐月照桐花冷一夜啼烏
盡白頭

青樓曲

渭曲花開送落暉含嚔少婦弄金徽青驄嘶向樓前過知是期門
射雉歸

少年行

躍馬天仙意氣豪春風紅袖拂吳刀自從公主辭朝去寂寞新豐

醉濁醪

金陵曲

紫禁蕭條煙水寒空餘雙闕倚雲端靈和殿裏千楊柳一任行人
馬上看

揚州曲三首

依然楊柳映朝霞銀鑰雕欄十萬家試問煙花看徧後何人回首
玉鉤斜

紅藥花開照玉鋪十三嬌女嫁長途可憐生小揚州住曾識雷塘
繡瓦無

翡翠簾輕不下鉤狂夫隨意入青樓吹殘玉管香風細斗帳微紅
染石榴

梨花曲

素綃不障玉人寒檻外風吹白玉鸞月落西軒銀燭冷憑欄猶作
夜珠看

橫江詞

妾住橫江江水東江頭夜夜白蘋風誰家艇子門前過不繫青絲
問綺櫳

席上贈程游擊二首

十載歸耕江上田每邀賓客赴高筵月明猶向燕然望重對青樽
話昔年

東園十里種梅花較勝青門五色瓜若問平川諸將佐年年風雪
臥龍沙

入塞曲

旌旗千簇卷雲霓一曲朱鏡雜鼓聲挾得胡雛何處醉錦衣歸過
酒泉西

流黃曲

桐花夜靜落機中獨對明河淡淡風和淚織完窗外月明珠錦樣
出鮫宮

七夕詞六首

秋砧擣罷思橫陳漫向明河欲問津月落千門銀燭暗一時多少倚欄人

織久應償天帝錢相逢何事尙經年人閒亦有貧家婦不信支機鎮獨眠

瓜果筵前月露深誰家少婦試穿鍼儘教學盡天孫巧何計能消望遠心

盈盈錦水足悲秋聞得人閒事轉愁多少才人偏薄倖莫將癡絕怨牽牛

漫向秦淮夜泛舟回看潢海影空流穿鍼宮女今何處無復蕭齊舊綺樓

鵲橋當曉又重過機畔還拋織錦梭有恨不堪回首望西風無限起銀河

九日

登高祇覺暮雲寒風雨開樽強自寬萬里關河迷遠望不知何處是長安

明妃夢還漢宮曲四首

祁連山外草連空遠嫁呼韓怨未窮夜逐琵琶絃上怨因風吹入建章宮

西宮聞道不勝情紈扇秋來幾變更夢到杜陵須駐馬一杯羊酪祭毛生

彷彿歸鞍到漢宮井泉北望起秋風恐憎憔悴渝前約乞賜臙脂嶺上紅

悲笳吹曉滿陰山手挾琵琶再出關未到草青新冢後夢魂無夜不生還

采蓮曲

護持簪珥上蓮舟短束紅裙映水流何事小姑遲蕩槳鴛鴦睡處慣凝眸

無題六首

曉起盈盈入幔來水晶簾畔釧聲迴開窗照影渾無語七出菱花
上玉臺

獨倚明妝對曉風桃花飄入畫樓中春歸賦就無人看敲枕虛眠
斗帳紅

秦珠的爍為誰圓繫向羅襦倍惘然爭道明河難問渡可堪同醉
杏花船

荳蔻年華十五餘晚風涼到石榴裙從教把袂銀鐙下垂卻珠簾
共看書

春前素手祇雙垂玉軫慵彈卻為誰昨夜侍兒初許嫁今朝別樣
畫蛾眉

明月秦淮最可憐狂夫歸夢阿誰邊章華臺畔輕盈柳回首春光
又幾年

吳茲受先生席上聽小史度曲賦示漢槎二首

一聲河滿出屏前幾度橫眸向綺筵憶徧舊人都不似銷魂莫說

李延年

東山太傅舊風流絲竹清風坐上頭聽罷伊涼傷往事蒼梧一望
不勝愁

時先生話巡撫楚湘舊事

同文夏訄士赴飲韓氏梅花園

澄江東去共停轅滿苑梅花日正暄賦罷樽前看似雪還疑同醉

孝王園

隆中

半月溪邊訪隱君便教功業定三分於今高臥何人在祇向空山

問夕雲

解珮渚

弄珠神女鏡中游照水輕將玉珮投今日乘槎江上過秋風南浦

不勝愁

安陸即鄂中

白雪樓臺一片霜高懸明月夜蒼茫金笳起處歌聲歇野老悽然
說獻皇

陽臺

登臺重與賦高唐神女行蹤若可望當日未應輕入夢爲雲曾御
楚先王

鷓鴣洲

欲把椒漿弔禰衡江中芳草一洲橫漁陽悲憤應難盡日夜風濤
作鼓聲

牛渚夜月

山頭何處暮鴉唳無恙歸帆浦口低千尺碧潭深映月不須乘興
夜燃犀

道士泚

西塞山前一繫舟桃花落去水空流雲中直下樓臺影瀉作銀河
萬里秋

紅衫曲

茜羅衫子石榴紅買向閭門繡最工好把明珠珍重繫莫教隨處
舞春風

感憶詞

聞君別館擁明珠皓手雙垂鎮向隅但憶當年初見意金環猶繫
合歡襦

席上

浪跡三湘最愴神歸來玳席正留賓陽關揮手分明是不道何處
已舊人

哭許墳友四首

月落任公舊釣臺聞君消息重徘徊年來多少相思話說向爐邊
倍可哀

寒林古木亂嗁鴉還記荆溪處士家玉女潭虛春寂寞可堪重看
杜鵑花

詞賦翩翩駕六朝蘭臺賓客共揚鏢故人幸有周侯在無復傷心

到孝標周侯謂文夏

罨畫溪頭望暮雲弟兄三載已離羣歸來勸母加餐後明月蘆花

不見君填友兄為僧莫其歸養

悼友

惆悵從今長別離憐君有母更無兒夜臺何限傷心事空奠東亭

酒一卮

笙歌曲

韓國香車昨夜過沈香火底聽笙歌窺簾暗認金環映秋水澄澄

注盼多

紫燕曲

畫閣雕梁拂柳絲水晶簾卷夜歸時一聲小語分明聽立盡牆東

射鳥兒

輓吳又鄴

高山流水幾知音處處猿嗥傷客心欲整朱絃君不見鍾期墓上

一彈琴

江寧偶興

白下原非古戰場青溪第宅鬱相望等閒歌管聲中過誰更輕流

淚幾行

江上懷戚价人鄧玉書

賦罷君山誰與看故人游宦客長安相思欲極登臨目六月江風

入暮寒

雜憶詩十八首

嬌女輕盈出後堂自矜年少正凝妝東風無賴裙吹皺微露桃花

小襦褶

曉對菱花鬢有光雙纏夜裏白如霜由來帳底分明看十九還同

蘇合房

相攜燈市夜深中歸向迴廊曲檻東纖手扶將行處暗幾彎纔見

月朦朧

碧桃開處倚東風記得拈題繡閣中小疊鸞箋吟未穩唾花衣袖
祇深籠

渡頭爭看彩船飛日透犀簾影未稀煖卸輕容偏愛惜怕將珠汗
溼人衣

藕花天氣獨來時小閣垂簾下女碁輸卻玉環佯不與邀人親解
綠絲兒

闌干曲曲徑相連夜半微行問獨眠月照綺幃人未醒渾身花影
大如錢

欲繡鴛鴦半睡時商量鍼綫繡來遲問人曾見鴛鴦未雌鳥翎毛
恐未宜

因爭雙陸露纖纖折損桃花指甲尖不語微嗔收玉局曉來湘管
不曾拈

晚涼新浴出屏風茉莉簪時墮髻鬆重教吹簫何處去湘紋簾箔

月濛濛

穿鍼子夜候南樓鈿盒藏蛛曉未收誰信凭闌終夕話相看仍似

隔河愁

團圓餅子白於霜小玉擎來過畫廊共展桃笙臨月坐那曾深夜
捉迷藏

閒修笥甲研紅綾小字如蠶手自謄卻笑郎書偏草草簪花新格
任他矜

賭酒輕搯鈞弋拳綺筵曾訝飲如泉筮篥一吐渾無力斜倚欄干
便惘然

人前刺刺怕人猜欲語踟躕又幾回對擁紅鑪輕畫字故將銀筯
撥鑪灰

合歡雙夢少翁傳燒得仙符夢果然曉起相看微一笑低頭已過
藥欄邊

來時雙鬢未成鴉倏裏湖州透額紗坐對文窗閒屈指庭前幾度

海桐花

如今早嫁淚偏多天壤王郎怨若何可惜翩翩蝴蝶影一生長在夢中過

送許士初舉孝廉之江寧二首

諸公袞袞石頭城君亦翩翩入洛行休向人前誇白雪恐教人聽不勝情

蕭蕭風雨正高秋極目鍾山萬古愁爾是壯游多意氣青驄莫過景陽樓

夜集許孝廉青嶼處送之北行

多君談笑涉風濤酒向離筵氣轉豪座客相看無別淚月明長望薊雲高

同曹生飲廣明處

西園公子自翩翩走馬銅街赴綺筵乍脫春衫花底醉流鶯嘯過畫欄前

別後懷繆歌起

繆子停舟訪我來薛公邀與共銜杯臨風擬盡同心語五斗闌干漫自回薛公謂固庵

懷平子遠

山陰佳客永和才昨自華亭聽鶴來傳得徐摛父子信等閒歸棹雪中開徐摛父子謂徐武靜及子安士

懷劉某三首

崎嶇薊北暮雲青市裏悲歌混客星尚有舊遊冠蓋盛知君食盡五侯鯖

長安蜚語最難堪行路艱難爾未諳莫倚才高忘口過人前捫蝨便高談

人逢按劍淚難收楚玉如真莫浪投歸後但留雙足在還攜賓客共遨遊

聖郎曲三首

梨園子弟不知愁北去燕山作浪遊知道花檀重按拍學來新調
半伊州

三載新聲動帝都都城春色滿平蕪琵琶樂府由來熟也入岐王
宅裏無

寄黃雲孫時初舉進士

一代紅顏額盡黃紛紛點染事君王誰言北地胭脂貴獨倚能歌
傅淡妝

寄劉瑞公

賦擅金門事可誇劉郎年少更風華如今莫憶天台路上苑春晴
好看花

卽墨送張子齊還海豐

登高望遠撫離徽華表春深正落暉漫道吾曹無別淚何堪客裏
送君歸

登華表峰望梳洗樓

夕陽斜照碧雲收玉女空餘梳洗樓但使明妝須再整紅鸞還跨
海西頭

憶許士在高郵

天高雁陣度疏榆曾逐晨風送賤軀聞道海西風浪急君將何處
采明珠

席上

紫燕堂前錦障圍最宜鐙下看容暉狂夫倚醉渾無賴斜靠琴牀
不肯歸

慇懃曲

太傅門庭少此人無端呼喚最慇懃還家自看何郎粉留取腰門
白雪巾

正誼堂詩集七絕之一

正誼堂詩集

七言排律一

清明同顧修遠黃甫錢礎日敖山來劉震修沛遠蔣路然嚴友秦樂天對巖鄒黎眉顧華風用杜少陵韻

纔過寒食萬家煙宿雨初晴好放船紅見疏籬桃杏出青知高
葛蘿緣鬪雞公子詩應就射雉黃門鬢可憐新築毬場人漸少
隨裙幄路依然春風別墅千杯酒野火邛邛幾一錢卻憶青城
闕冷杜鵑嘔血自年年

斜陽照舍東乖龍天罰耳應聾魚攀急溜乘新漲晴

散遠空自是江南三月好誰逢漢代五侯同霞落浦明青草返

棹隨煙度碧楓蹴踘錢分村社後人畫樓中藥鑪茶竈還

家有乞火淒涼似野翁

正誼堂詩集七言排律一

正誼堂詩集

七言絕句二

送沈漸卿至錫山話別

遠送難教楚棹停
傷心空望九峯青
誰言沈醉堪分手
別酒臨風每易醒

過小瞻姪別業

來尋小阮竹林中
短袂涼時卷暮風
花事已闌嗁鳥歇
茶煙飄處一枝紅

送客之燕

月落歌筵對舉杯
送君遙上柏梁臺
舊爲獨步江東客
今作空羣冀北才

晚江

把酒高歌欲扣舷
雄懷傾對大江前
雁行橫過斜陽去
一片蘆花接暮天

贈江郎

每憶紅顏宛在前，忽驚憔悴劇相憐。原來采石輕分手，不見江郎已十年。

邗溝和白孟新

寒雲漠漠古邗溝，落照荒荒望石頭。往事六朝渾是夢，旅情三月已悲秋。

同黃仙裳飲宗定九齋頭

有客同過芍藥橋，江都才子舊相邀。恩恩把酒論疇昔，猶與征人慰寂寥。

贈宗定九讀書法海寺

隋隄一望柳如煙，橋畔簫聲和錦絃。爲問少文何處臥，上方鐘磬白雲邊。

舟次

春風三月布帆來，有客行吟思轉哀。路入黃河無柳色，時時回首

望章臺

道中漫題

平原日落散牛羊，遙指雲邊是故鄉。春燕自南人自北，呢喃早得傍雕梁。

水部公旅櫬得馳驛還南行次中塗感泣有作四首

灤津一帶禹功存，憔悴河工隕薊門。聖主應憐臣力盡，故教身後復承恩。

司空分署出都門，望闕時時戀至尊。縱使靈輻乘傳去，孤臣恐有未歸魂。

十載爲郎似水貧，孤兒何計度鄉津。追思不是君恩重，客路飄零早負薪。

打鼓鳴榔下御河，白楊蕭瑟輓夫多。可憐舊僕騎官馬，猶作長安道上過。

扶櫬至天津，傳聞有警荷甘。大都督多遣官兵衛，送追賦二詩。

魚鹽羣盜日紛紜卻遇甘侯正領軍假得兵符千里送布帆無恙指吳雲

先人客宦一囊輕便過南塘也不驚偏得將軍能感舊吹笳列戟擁銘旌

舟次有阻展讀諸公祭先君文感泣鳴謝四首

當日知交滿帝都山陽誰不念黃墟可知此夜停舟處笛裏聲聲喚鷓鴣

人琴一旦已云亡眼見飛灰上北邙幸有平生堪論定一時哀誄競傳揚

感懷存沒兩留連盡道箕裘屬後賢慚愧張充三十內臂鷹牽犬不堪憐

爭歌楚些共招魂屈宋文章自絕倫無奈總帷長跪讀西風斷纜又黃昏

蔡公子虛來代先君由楊村道中致賻率寄一詩

卻憶陳書請代時新官名姓故人知可憐多少生平話欲訴君前奈已遲

扶襯至清江浦河冰凍合厚三尺餘戶工關使者吳郭兩君特爲親督役卒兼募民夫鑿之至五鼓出關作打兵行三首

天寒水凍亦尋常旅櫬難歸使斷腸當日庾公愁出峽此行何啻過瞿塘

冬日河工未報完先君念盡役夫寒千人落指椎冰下多恐孤魂又不安

關使曾無半面知累他風雪夜深時司空治水劬勞久何事波臣尙苦羈

邵伯驛阻兵荷王大將軍命方舟前發因得扶襯雜官軍以行作從軍行三首

樓船下瀨將才雄八部旌旗卷朔風我獨縞衣君莫怪孤兒原隸羽林中

嚴親旅魄竟何之野草黃沙歸路遲昨夜陣雲千里合軍中隱隱見靈旗

每驚擊鼓淚先揮日夜麻衣侍總幃知道忠魂原不怨祇如馬革裹尸歸

袁重其娶錫姬以慧山圖索贈言因和堆山大師原韻祝其生子且呈固菴

新餐黛色曉山多好唱情人碧玉歌更汲山泉洗兒去山中樂事已無過

贈徐松之竹徑微涼度早秋一樽濁酒話離愁都憐三十同潘鬢何事還隨俠少遊

莊錫公舅章公訓兄夜集經旬臥病少逢迎二仲來時徑草生同調遠推甥舅好兩交終見弟兄情

為周櫟園先生題畫冊十首

程司空端伯作寒林圖一帶人家都在山罅近修至欲買隱此閒

寒林古木向雲侵歷落相望擁碧岑隙處恐教山意淡故將茆屋補雲林

盛林筆意頗似天游幼文諸公特作幽人冒雨出空山且挈婦偕往似非尋花訪友如卷中老衲所題雪堂云為訪前山空翠

色頓教忘卻雨溟濛余為更進一語山堂風雨合幽棲何事籃輿逐遠蹊多恐姓名人漸識移家更向白雲西

楊龍友以倪黃筆寫董巨法李岷瞻謂其氣韻太足故疏潤浮動響山人亦極賞之

誰向清溪擲釣竿水亭空自傍林端擬攜書卷閒來坐澹澹山容面面看

煙波畫艇圖是項孔彰寄興之作葉訥菴以元暉高韻比之有
相看渾似雪中樵之句余亦愛此景因識之以當臥遊
雲樹濃媚遠山煙波淡淡一舟還前溪不識通何處綠上空亭
草自閒

龔半千畫樹以直取妍畫山以枯見腴芝麓賞其骨重神寒比
之魏徵嫵媚石門一頁陰森之景殊以秀潤爲姿余與西樵程
邨各題一絕頗有石門訪道之思欲覓此中人相語

雨暗羣峯樹樹秋藤蘿深掩石門幽此中高臥何人在門外陰晴
試問不

曹顧菴題辭云近修舊不作畫遊戲爲之便自神詣茲畫江空
浮遠山一抹如青黛
極賞之余展閱數過頗憶昔年身在
楚江邊望峴山一帶也

江平如鏡數帆開淡湧春山黛未堆誰向鏡中餐遠色隔江疑望
美人來

譚長益云華亭詩畫近成一派友鴻出乎類萃故奇此豈有不
足於華亭詩而并託之於畫耶細觀之真氣磅礴絕無依傍臨
摹觀其畫知其詩矣至余詩則姑誌其畫中之景

山容潦倒煙中出樹態支離雨後妍乘興貪看渾未返扁舟猶繫
草亭邊

米灘圖彷彿小李將軍危石盤渦急流紛激一舟攀溜而上出險
殊難而瓦屋傍山崖有高人坐望之態致閒適余閱之歎息因
成一詩櫟園憂患餘生應不河漢此語

懸崖石浪最嶙峋百丈羣牽險自真誰向灘前高坐穩多應灘畔
過來人

繪色難繪聲善繪者至能寫聲於色茲秋草秋蟲圖無畫家款
識錢湘靈謂渲染處極似彼家舜舉此近人之善寫聲者也
牽牛花發露華輕絡緯驚寒曉尙鳴誰道眼聞原幻語展來四壁
已秋聲

石殘寫桃園圖不著桃花井不著田舍桑麻人民雞犬止有小舟艤山根一漁人循石徑至洞口或曰若無漁人更佳余則曰無此條熟徑乃更佳耳然桃源亦在人意中爲之石公儻別有意

豈是人閒未竟忘長留一徑待漁郎石公笑道君休問今見何人固首陽

爲錢生題秋江晚景圖二首

淺黛遙橫接暮天依稀人影著輕煙扁舟泛泛隨波去江上閒鷗自穩眼

莫賦湘靈鼓瑟詩秋風早理釣魚絲鏡湖賀監歸來晚消受煙波得幾時

爲陳賡明題石勒聽漢書圖二首

陳章侯畫

英雄漫說漢高皇銷印猶須張子房不道季龍甘北面翻能閒論識興亡

章侯人物畫偏奇磊落形神此較宜傾聽宛然生氣在還如倚嘯洛陽時

題吳山圖

嬌歌豔舞憶當年襟帶江湖尙宛然漫道完顏曾立馬青山祇藉美人傳

題温太真蒙紗圖

玉鏡臺邊見已頻未披紗扇自相親如今在費丹青巧難認當年温太真

爲李雲田題楚江狂客圖八首

圖中寫夫人與妾寶鏡共席題詩侍兒掃鏡在側諸姬各執樂器雲

田拍手聽歌

桃花紅雨柳花絲渲就三春兒女天朱鳥窗扉都不掩花房曲曲徑相連

誰言邢尹不相望兩兩同栖蘇合房粉靨黛痕都彷彿教人花底費端相

後堂遺卷夏侯衣伎樂明妝見亦希趙瑟秦箏吳苑曲歌彈應駐
楚雲飛

金谷豪華金屋嬌賓朋何必更相邀詩人祇在鴛鴦社分劈巴箋
韻更饒

大婦詩成斂玉纖應催小婦續香匳沈吟豈有難言處湘管還從
左手拈

對面渾如並蒂枝眼看全似不相疑欲猜心底悲歡事祇有傍邊
小玉知

相顧相憐事頗宜縱教相妒亦堪思花花葉葉低昂映不是尋常
戶外枝

誰從花國恣留連注眼分明著意偏酒態傾敬人盡識楚江狂客
李雲田

閏七月七夕明河曲六首

金梭罷織更良宵又跨銀河烏鵲橋早得佳期如許近不傳霜帔

下雲霄

誰家兒女復登樓綵縷穿鍼苦未休若使天孫能送巧已先分得
與牽牛

漠漠天街曉色俄更須惆悵渡銀河雕陵鵲散回頭望翻是今年
別淚多

曾歸董永是何人不信天孫下嫁頻織絹果教留一月那貪今夕
此重親

此夕人閒重有思報章空託七襄詩盈盈不見凭肩望腸斷前番
私語時

錦石支機冷月華金風吹動漢橫斜乘秋有客應先到計日何須
八月槎

長生曲二首

曾逐金丸市上行到今追憶倍傷情何人挾彈來江上猶識狂夫
舊姓名

莫道狂夫似舊狂相逢欲避贊公房自從零落江東後不上王孫
玳瑁牀

山陰呂黍字自揚州攜高小史至索和紅橋漫成十二絕

楊枝婀娜紫雲輕絃索登郎更擅名贏得雙髯詩句好江南江北

動關情如皋冒氏歌童楊枝紫雲為其年所狎吳錦雯向攜登郎至俱索余詩

何處還來繡被舟越人曾到古揚州歸時學得簫聲好沽酒蘭陵

恣冶遊

我亦當年舊酒徒王孫牀畔醉呼盧如今見爾還相憶拾得金丸

酒更沽

把酒風前重有思醉來越覺呂郎癡袖中詩卷頻頻看道是紅橋

旅夢詞

司李揚州王阮亭紅橋雙曲舊曾聽從君好夢輕回後草色愁添

一倍青

珊瑚軸子浣花箋畫得愁容也自妍石畔桃笙誰共坐知君展罷

越相憐

檠燈襪被自蕭蕭莫道紅橋盡寂寥楊柳旗亭明月夜一時都和

紫宮謠

人去閨門作意遲待教狂客識相思重來指點紅橋路彷彿前宵

入夢時

欲別紅橋又幾停櫻桃熟後乍揚舫吳山越水將攜徧祇當紅橋

夢未醒

寓樓客到幾徘徊恐是侵晨夢未迴恰遇薔薇初盥罷敝衣窮袴

下樓來

驚看小字寫烏絲都是狂夫舊日詩落拓才名誰更數流傳應待

寫完時時小史為黍字寫余舊詩成帙

來時芍藥兩三枝去日荷花開滿池一晌不知春可惜忽然惆悵

又成詩

吳錦雲席上看登郎重繫三絃子歌四首

正誼堂詩集七絕之二
吳公風雪夜開筵重看登郎分外妍一曲清歌爭欲聽斷人腸是

第三絕

腰閒珍重繫明珠長伴冰絃一兩絢不向紫囊重覓取肯教容易

見羅襦

漫將檀軫扣朱絲調得新聲入破遲知道有人簾內聽手拈紅豆

已多時

座上金樽不暫停獨憐愁客醉如醒縱教彈盡江南曲祇當伊涼

水調聽

聞鐘

醉聞新曲漫流連何處鐘聲落綺筵十五年來心底事陡然都到

酒杯前

慧蘭詞

一笑盞前似欲迎回身還向後堂行手推不管魂消盡暖玉光凝

火齊明

正誼堂詩集

七言絕句三

王北山都諫邀同吳襄宗賀天士何雍南程干一遊焦山漫成十
二首

晴江春望曉雲紅
濟濟奔濤日向東
一點金鰲難獨障
蹲獅還控

海門雄山為獅形一名獅山
王公江口坐相邀
擊楫同遊趁去潮
漸見穠陰分樹隙
參差樓閣

出山腰

松徑雲開敞石屏
山根巖岬漾滄溟
寺門多少閒碑版
客到先尋

瘞鶴銘
古篆爭看周鼎奇
墨亭曾取石幢移
程王好事新題徧
忘勒江淹

舊日詩江有與陸東海焦山述懷詩

枯木堂前清磬聞
水晶庵後竹侵雲
香鑪茗椀高僧在
閒話翻疑

對隱君時繼起寓此

丹井仙壇漢代遺焦光名姓豈傳疑如何輕入君王夢不似當年

三詔時

光一云先漢末三詔不起至宋真宗夢見之

新軍分鎮徧南徐安穩譙門處士廬填海休教精衛到山中木石恐無餘

別湧松寥一水漚鳴傳青玉更深幽銜杯尚覺乾坤隘捫日還登最上頭

危峯邀客到青天鳥道迴盤石棧偏矯首吸江亭上望好呼郭璞

賦遊仙

亭面西對郭墓

南崗萬樹鬱嵯峨石壁斜飛險更多誰向最高巖畔立忽聞人語出煙蘿

雲端木末共躋攀蘇米題名石盡斑歸去欲留餘地想徧遊不到

碧桃灣

舟迴芳浦立斯須落照翻時黛色殊卻訝東巖輿地盡不知何處

采明珠

禁海以此山為界

題金山寺

幾年不到金山寺埤堦增雄壁壘奇更向妙高臺上望清秋添得阮亭詩

遇莊氏歌人戍郎

曾見張郎最小時當筵學唱鬪春詞如今自領梨園隊已是三年作教詩

楊彭山春遊曲示同遊彭士報陳大來何雍南賀天士程千一索

和十二首

比來作客易思家况值清明感歲華病起難忘春爛熳借騎官馬去看花

徧訪桃花徑幾迴楊彭山下一株開招呼共向壚頭飲已有輕紅

墮酒杯

麝檀吹和氣氤氳少婦拈香簇似雲漫把宜男私禱徧後堂重拜

碧霞君

梵宮嶽廟兩相望八角亭穿覆木香見說盤根三百歲還隨桃柳度春芳

北固臨江簇一巒參差樓觀著煙寒山中不見山容好圖畫偏宜此處看

羣峯三面送遙青十萬人家列畫屏遙指牙旗黃閃處一鞭飛電出芳垌

楊柳平隄好射棚齊誇身手健兒能相逢欲數鵬鴒箭昨夜南塘放未曾

經過誰是雅娘家白板雙扉柳半遮有客到來春睡起前廊鸚鵡蚤呼茶

芍藥新栽畫卷關幾閒茅屋對青山花開記取尋僧到金盞橋頭路轉灣

北姝裝辮屬為鞞逐隊紅顏下馬過各向山腰新冢哭阿誰偏有淚痕多

旗亭曲曲奏陽春挈伴纔過喚酒頻正值吳娘幃底出當場獨唱鬪鷓鴣

漂白溪前素練浮染紅坊外絳渠流醉歸勒馬猶迴望明日春晴好再遊

正誼堂詩集七絕之三

正誼堂詩集

五言古

擬古十九首

行行復迴顧步出中門遲人生不長聚安用心相知宿昔奉君歡
一朝生別離越鳥南北翔代馬東南馳故鄉日以隔故人日以憶
客身難爲曉客心難爲夕同心各異路誰知飢與渴棄捐不必言
相思亦何益

楚楚懷中萸娟娟手中蕙盈盈臺上女飄飄揚素袂煙煙艾納芬
熠熠明珠綴卷髻工挾瑟逾時理巾悅當時一顧意寸心奉嘉惠
慚無抱柱信負此芬芳歲

靡靡原上草冉冉風中柳奄忽成古今誰知百年久家居不自樂
驅馬京國走遨遊宛洛聞名都一何阜相逢要路津半屬親與舊
兩宮通肺腑四姓聯杯酒本無結納情何期責望厚片言不稱意
中道思印友曰歸誠未晚歲月亦已負

今日樂相樂宴會及故鄉左攜安陵子右挈趙代倡徵歌競自媚
含意在抑揚賓從各避席命之進一觴主人起相酬數稱夜未央
人生若蜉蝣朝暮亦自長況假歲與月爲歡安可量聖賢亦陳蹟
將相未足強苦辛復何爲窮賤莫自傷

臨河有高樓俯視浮雲低罌罍網高鳥鴻鵠不敢飛中有哀吟聲
聽者不自持誰能爲此曲無乃子高妻河廣波濤驚樓高烈風吹
不如臨康莊任彼末路歧一唱再三歎終奈知音希

陟山采椒蘭涉江采衡芷馨香欲貽誰攬之聊自喜佳人抱沈思
遠望徒倚徒但持方寸心不堪贈君子

孟冬寒凜冽葉落成萎腐一朝扇和風陽春照衢路嗟彼桃李枝
不復畏霜露昔承松柏蔭今時復相妒念欲移根株奈如磐石固
我有平生親膠漆旣云素患難相因依安樂不我顧踟躕還自念
棄置良有故往時抱區區遂蒙知己慕有何比松柏怨望亦已誤
萃萃高山桐本是鳳所棲纖纖機上手舊爲君所持鳳去無德音

君行無見期千里託相念君心誰見之軒車遠行遊不如我所思
我思徧天涯軒車行何遲朝思不及餐暮思不及夢憔悴損昔顏
猶虞雀角訟本非千金軀因君還鄭重

冉冉瀟湘竹至今斑淚滋伐之爲枕簟將遺我所思故痕積新淚
相閒何離離君今欲高臥拂拭應念之

拳拳一明月云有姮娥奔竊藥求長生遂負宿昔恩故夫永相隔
神仙何足論盈盈河漢閒乃有天帝孫牽牛雖迢遞夙愛良所敦
驅車東郭門迴車北郭道但見新冢閒莽莽垂宿草去日益以多
故人益以少飛鳴會有時置身不如早功業垂千秋榮名固爲寶
不令知己見炫耀自言好豈無睚眦恨嗟彼安足傲輕將鴻鵠志
雪此鷓鴣笑振翮空爾爲念茲耿懷抱

高高萬仞崗四邊盡一矚浮雲東南起風吹斷欲續遙望蓬萊島
彷彿見邑屋中有仙人紅顏美結束手把珊瑚枝或彈流水曲
鮫人濯明錦製爲合歡褥侍女何繽紛一一顏如玉襄涉往從之

解佩良所欲飛薄起天末馮夷前導速畏此風中波願言矢幽獨
脂車出門遊經年已過歸相去無幾時故鄉良可悲城市已蕩滌
親舊遺阿誰謂是零落盡何無冢纍纍徒步行郊原一望中心摧
積有陳死人枯骨何崔巍乃知格戰死未及焚爲灰片骨遺中塗
知爾是阿誰羣鳥食肉盡委地生青苔不問親與仇哭之盡其哀
人生不知保旦暮亦可危諒無千歲壽服散空爾爲不如及生前
飲酒日百杯衣馬侈輕肥顧影堪徘徊

愛者自爲新憎者自爲故新故在人心何論縑與素故人亦織縑
新人亦織素本愛新人縑將縑珍重顧裁爲雙中衣長短手自度
視故不如新視縑因勝素寧知所著縑故人手所作將素復比縑
新人原勝故君行不識察愛縑良已誤

生年卽百歲半閱夢寐中并將白日棄碌碌將焉窮爲樂及盛年
老大傷龍鍾卽在神仙伍吾憐短老翁何如王子晉吹笙方冶容
桑蠶變爲蛾橘蠹變爲蝶雉入水爲蜃雀入水爲蛤當其既化後

詎復思疇昔逐時爲變遷生平每自失趙女學彈箏因君不好瑟
古來賢豪人日暮恆改轍

三五蟾兔盈空庭起幽思一一平生親形神宛相視古歡諒可要
車馬不一至終歲常家居書札四遠寄此言長相思彼言勿相棄
長跪讀書詞琅琅出涕淚珍重不敢褻藏之幾盈笥經時一展讀
歷歷記姓氏獨有京華客三歲無一字昨日相見時但言苦爲吏
我有一端綺故人舊所遺上有兩鴛鴦文采何陸離恐傷雙飛翼
剪裁不忍施縫爲合歡被雜用素綵絲熏以銅博山青煙繚繞之
宛轉臥其中獨夢我所思膠漆遠難分千秋以爲期

歌詩忽欲竟座客且停杯辭煩意便復歷亂有餘哀聊以感別離
并爲年命悲聽者各言好未見心徘徊知音諒難遇且復陳金罍
盤中亦有膾釜中亦有炊加餐不努力憔悴將告誰

楚行別黃雲孫鄒訶士

鴻雁千里至長跪讀父書書云望子久何當戀故廬又云行路難

正誼堂五古一
游子且停車親心自宛惻讀罷無踟躕呼童具行李暮出城西隅
秋月照我顏枯風吹我裾一二同心人送我歌驪駒爲惜參與商
淚下相唏噓舉策還致謝累子以賤軀豈不念故人高堂日望子
揮手河之梁行行竟前驅

別毛申人

結交長聚首不能滿百年何當復分離參商各一天仰視雲中雁
鍛羽還高軒豈無千里程並翮何翩翩涼秋八九月北風吹我顏
攜手河之干行行不能前恐傷君子心忍淚空自憐

和阮嗣宗詠懷

弱年苦行役日暮悲深林駕言欲遄歸我馬徒駸駸眺望楚陽臺
悠悠非我心大夫縱多材何以教荒淫朝雲猶飄忽神女今難尋
中夜望故鄉太息愁難禁

送龔墨鞋

孤城吹感策日暮羣馬嘶故人遠行遊舉鞭方別離桑弧誰不念

奈此斯須時明月照中闔送子酒一卮干戈徧四埜前路未可知
所願各努力相見會有期

古詩

結髮事君子願爲鴛與鴦風波無處所東西各翱翔弦望自有時
佳期杳難望欲遣一端綺道遠不可將但得復相見棄置何足傷
贈毛公阮

蘭蕙生春谷芙蓉媚秋江豈無眾卉榮難與並幽芳之子青雲姿
矯矯臨風翔出塵本無意遐舉何足量與君結交初終日澹相忘
十日不相見寸心各自將

贈鄒訢士

梁園賦雪才稷館談天客家世本華綺交游殊絡繹早歲擅風流
詞藻擲金石束髮忝齊名意氣非要結贈君大秦珠遺我錦段匹
膠漆諒難分勉旃抱良璧

贈龔瑯琊

與君結相於夙昔薄小儒倒執珊瑚鞭走馬臨大衢妒人蜚語工
報復在須臾歲月何遷次鬢鬢共有鬚君其慎自愛作事重躊躕
望君采芻蕘毋忘輕賤軀

贈毛申人

昔年十四五洛浦方吹笙贈爾黃金彊慨焉許平生道逢輕薄子
相要意氣傾豈不愛交通念此夙昔情相期崇令德與君共邁征
何徒振詞翰琅琅延令名

月夜同詩士由寒山寺步虎邱

遙望吳閶門星光湛長空城闔徧素暉澄流映疏峰天上落空翠
盈此招提宮皓魄鑿行路攜手歸林中道逢便娟人綺羅揚妙風
迴顧欲橫陳悠悠抱微衷前邱何緬邈白雲倚深叢雕櫳杳無際
曠然懷生公

登鶴山通真觀月夜望海

在卽

振步鶴山崗緬緲極千里暮雲抱高松嵐翠紛相倚磬發諸天靜

羣態奏妙理濯濯海月鮮紅霞媚遠水潮迴倒前山魚龍夜驚徙
臨流杳深沈愾焉酌仙醴悠悠大島空田橫竟已死達哉漢逢萌
高蹈實從此願乘雙黃鶴采藥神山裏

遊鳳凰峯慧矩院

在卽

夕陰澄大海千山翠色微林深雲自宿峯高鳥倦飛奇花低昂開
衣袂襲芳菲迴崗竦積石飛泉走珠璣煙光未盡斂臺殿相因依
尋仙杳無際空思拜真妃徘徊石梁畔日暮憺忘歸

廣陵驛送詩士北上

南方有佳人娥娥清風女弟競明妝皎若雙芙蓉娥眉不解妒
手爪亦頗同惠心發妙質歌彈各言工夙昔共親幃歡愛結微悰
一朝奉詔使先入昭陽宮相送江水邊淚落江水中標梅非敢怨
所悲曠音容

碩人傾城姿幽居本窈窕一蒙人顧盼紅顏似加好鬢髮設巾笄
惠體辭綦縞出門上華輪將就萬里道萬里何遙遙朔風吹黃草

毋乃車馬勞千金慎自保更聞三千女半出秦與趙挾瑟更彈箏
工讒令人老努力事君王勿使車塵杳

嶧陽一株桐斲爲几上琴一彈風雨收再彈下祥禽自我操別曲
三撫不成音恨如比翼鳥分飛丹樹林妾歸還入戶明月伴青砧
越禮非所安不字誰見欽之子儻相憐但留萬里心人心苟膠漆
何必同華衾相見會有期淚下無沾襟

古意寄譚韶成

美人昔邂逅乃在陽臺旁自我漢濱歸再登白玉堂贈遺何所有
紈扇圖鴛鴦上有別離詞蠶書三五行出入常自攜懷袖生輝光
三載勿復見對之淚琅琅紅顏縱憔悴歡好在衷腸高樓有明月
夜夜照沉湘

輓葉聖野

舊遊吳閶門少小學聲詩菲才不見棄幸蒙君子知把酒邀後會
秋風以爲期自我江漢游遂成久別離豈不懷曠達爲君長相思

裁成尺素字因風將遠遺昨有上客來言君無見期欲寄徒茫茫
對客焚毀之客亦慘不歡相顧失言辭

同公阮雲孫訐士瑯琊初子賡明遊劍門至錢尙書拂水山房賦
示無錫宜興江陰及常熟諸子

緒風蕩柔槩澄川浴暎曜仰視丹峯霞翻飛卷晴昊步竦危巒
聿至劍門道削然紺石開雲氣鬱相冒下層淵靜臨流數蘭橈
曲如羽觴流皎若犀燭照去子周旋迴崗展遐眺拂水無怒瀾
懸崖自深峭木末見雲厯厯明海嶠紆軫恣緬懷與客舒長嘯

古意

章臺有好女皎若芙蓉舒十二工刺繡十五博羣書夙昔無猜嫌
中夜共樓居明鏡照窈窕含笑送青臚惠不惜贈吝此千金軀
衣帶何所繫舊時雙明珠三載勿棄擲敢忘致區區
采采園中花芬芳入羅綺輕風卷衣帶時見顏色喜對博玉樽蒲
合尊酌芳醴自言慕德音日夕侍君子恩情非訣絕所難在越禮

持此方寸情相親空倚徙百金買古琴纖手自能理彈向淥水池
匹鳥雙飛起

青青楊柳岸下有扁舟維美人坐高樓彷彿望見之君子遠行遊
含淚進一辭作客苦憔悴加餐善自持勿以輕微軀累子千里思
聞此感良意何以慰別離遠望天一方道阻舟楫遲恩私非所望
恐無秣馬期

望南陽湖

輕嗽麗雲天鷺鷥喜晴曙夷猶此揚舫川光澹容與靡靡如游空
余傍煙際去平湖照蘋霞極眺杳何處習師弄澄淥炊煙出芳樹
列嶂送遙豔翠屏浮浦漱獨酌曠心目佳人渺難遇

擬鄴中公讌詩

曹子桓丕

文帝初在鄴宮遊讌距策為魏太子日尚六七年康樂擬鄴中
集詩題中不應稱太子詩中亦不宜言家王拯生民無論其體

調與建安相去也茲為正之

參天列羣岳俛視垤與邱猗歎眾君子冠蓋紛相投西園做華筵
坐見星河流芙蓉扇清芬瓜李隨沈浮澄波動明月知有修鱗遊
清歌羣籟寂妙舞梁塵收吐哺良不須高賢方獻酬相期在不朽
心意結綢繆慚無高言唱樂方殊可求

王仲宣祭

侍中三公華胄遭難流離至奉琮歸曹乃心實附其出處自與
陳阮不倫故他書言遭遇風雲際託身鸞鳳閒而公讌原詩亦
皆稱功懷德之語茲推本意特去曼音

秦川昔喪亂家世難具陳攬鑑知寢弱博聞安足論所賴歸人傑
託命安微生從軍遇神武侍酒江漢濱懷德既難忘復蒙公子親
德音發高唱敬愛何其真高會鄴中園明鏡照華茵登樓忽以樂
倒屣復眾賓毘毘妙歌舞圓方羅錯珍涼風散溽氣入座吹金纓
區宇徧蕩滌以望賢主人不醉諒無歸羽爵勿逡巡

陳孔璋琳

孔璋爲本初書記罪狀曹公歸命見容不無疑懼蓋弦上之對
偶出一時而遊覽諸篇欬歔惆悵每歎不娛略可見矣公讌招
遊情難直敘雖原詩半闕詞旨可推茲故爲抑宛入神之語
西池蒸暑散跳首盡長空遠樹抱微雲玄鶴翔輕風覽之自言適
追念羈旅窮伊昔悼亂階窘身河朔中萬事非得已知己幸見容
餘生荷明賜遊讌得追從急觴迴曲沼白日冒芙蓉爲樂恨已晚
酬報將焉終薄質愧自立微詞漫言工望君建魏勳爲銘鼎與鐘
徐瑋長幹

瑋長諸詩雖云舒緩要本枚蘇而體道修行輕官忽祿累因旌
命辭疾文帝稱其恬澹寡慾有箕山之志蓋知之有素故從容
樽酒不難自陳既缺原詩可以擬議

昔居北海濱宛洛非所慕賤軀亦何爲遂蒙君子顧踟躕簪組前
徘徊箕穎路恐違盼睐意府中久跼步昨出西掖垣休浣矢幽脞

今來北寺門追隨慶良晤旨酒眾賓傾清歌彼美度既醉前致辭
微衷一以吐願違旌命重愜此平生悆厚德匪輕忘濫竽恐久誤
劉公幹楨

原詩云投翰長太息綺麗不可忘而被酒視甄遂蹈不敬且諸
子極陳歡樂要皆歸美主人劉則非頌非規卓犖自肆故擬之
亦異諸篇

禁省繁簿領歡情不能宣舍之西城遊日昃未言旋角距喧鬪雞
灑血驚射鳶復來芙蓉池明月何娟娟水鳥狎游鱗珍木倒清川
華館金尊開別苑絃歌傳撫茲廓落帶中心自拳拳佳人跂不至
愁絕終難捐

阮元瑜瑀

魏武辟元瑜不應焚山得之怒使就伎鼓琴呈歌此說雖非信
傳然大約辭疾避役始不屈於曹洪後乃投杖於魏武良非得
已故篇中多言外之意而憂生悼老復見乎辭

崇仁布嘉會逝將息干戈公子既燕閒酌酒顏方酩中堂奏箏瑟
後堂紛綺羅涼風拂華棖明月蕩金波何期府中趨對此芙與荷
念當投杖起從軍遠經過馬上騁書檄漸見鬢髮皤人命雖百齡
徘徊能幾何不如及樽前慷慨臨高歌

應德璋場

德璋流離世故建章臺之作託物寄情自鳴辛苦因想其中多
鬱結或當被酒言懷故較原詩稍廣其意

蕭蕭雲中鴻鏃羽良可悲衝霜迴衡嶺負雪渡江湄我家本穎汝
飄飄翅亦垂中道得羈栖託身已忘歸公子敬愛客置酒褰重帷
文藻吐清華慨焉欲伸眉願爲極謹樂去日知難追不副飢渴懷
含情復贈誰

曹子建植

子建封平原爲建安十六年歡讌鄴宮於時父寵方隆兄情未
隙不應遂有憂生之嗟若以楊修之死內不自安則在建安二

十二年幹琳瑯楨一時俱逝何緣復與此會況先是一年祭已
亡而瑀且先五年也茲於其少時飲酒任性想其神情而憂生
之意不及

公子敬愛客尤憐棠與枝貴客夜行遊并集西園池皓月靜飛塵
弄姿漾清漪魚跳圓綺浪鳥憩鼓涼颺灼灼芙蓉花鴛鴦相因依
緬彼紅顏人一見難再期不如飲長夜並坐吹壎篪

正誼堂詩集五言古之一

正誼堂詩集
五言古二

溧陽彭孝廉舅以太夫人七十命靈賦詩敬作長歌為壽

靈母彭也甥彭家瀨水渚少蒙外氏育恩勤視如女日侍太夫人
追隨習儀矩至今五十餘夢寐恆共處疇昔事難忘呼靈常與語
為云太夫人淑德難為旅家本金沙望賢聲父與祖于歸作冢婦
好合稱良侶門戶本相當持家善自主姑嫜心愛敬娣姒容和煦
富貴非所矜勞勩親操杵朝營窗下繡暮軋機中杼婦職無不為
詎閒寒與暑池塘有錦鱗園亭足佳樹中門常作限終歲勿躡履
託身在朱門不啻梁鴻庶習禮更明詩詠絮安足詡吾舅本賢豪
聲名夙自豎曠志卻金龜玄談捉玉塵馬將金作埒蠟代薪為炬
賓客集金張壇坫奔邾莒華堂良讌會驪酒陳肥羶咄哉中饋賢
雜佩遺珩瑀經營多慘澹措置見條緒黃金雖日散不致歌終窶
有子本奇傑母教實兼父既聞剗薦勤復見丸熊苦所以昂昂駒

少小力知努矯首凌秋風賢書薦壬午今爲文章伯姓名在寰宇
我爲汝家婦食貧苦自茹及荷 朝廷恩冠帔加綦組枯榮先後
歷我今已成姥具遵姆氏教幸得無過舉憶昔歸母家送我淚如
雨自我歸汝家音信日相距遣婢歲一來歷陸遺筐篋膾魚圓作
餅切鹿方爲脯熏成櫻與筍包將粟與芋餘物各隨時精好悉如
許爾父且見珍爾來先攫取豈知爾母心對物愁難杼會當離亂
日避地來吾土曩顏欣再接舊事還重敘綠車時一過意謂長相
聚爾父忽之官鳴榔復打鼓別姆往襄陽姆亦從此去是時烽火
連長江斷樓櫓姆殊念我切教兒涉江浦寄我一紙書遺我一端
紵珍重手自裁藏之勿曳婁汝父爲廉吏一介慎取與慚無琅玕
報報之絲一縷汝昔亦登堂念我因憐汝助汝崇令名殷勤進雞
黍奴飯馬青芻送罷還延伫此意慎無忘我懷久獨貯今歲滿七
旬鳩杖聞初拄子持毛檄進孫接綵衣舞強飯勸加餐雕胡諒能
煮我思奉一觴躑躅行偏僂譬如林中鳥垂垂難刷羽爲我作長

篇悉將母德序庶幾輶軒客采之獻當之長跪記母言書之遂盈
楮行溯投金淵敬進瑤池醕

宿吳江丁繡夫書齋曉別并示吳弘人

玄冬十一月客行常苦難況我離憂人中夜摧心肝明月照中闕
對之淚闌干主人起相勸但聽非所安厚誼重難違握手徒盤桓
荒雞四野號驚禽發羽翰奈當從此別晨起不及餐會面自有期
去路良悲酸共君愛玉體跬步慎風寒

遙送吳漢槎戍寧固塔三首

客從遠方來氣咽不能辭問客至再三言君無返期妒人工讒言
不令聽者思但憎魚目偽秦珠反見疑但言桑濮淫其姜亦見嗤
本無白玉瑕蒙此錦與箕君今在桎梏仰天誰見知徒令有心人
悲傷難自持

遠戍在何所乃在古遼陽離家一萬里回首非故鄉知君萬里心
痛迫摧中腸紅顏泣故帷白髮愁高堂兄弟兩三人中道不成行

況在親與故安能共頡頏我有尊中酒欲餞遠莫將泣望朔雲飛
淚下何浪浪但期夢寐閒儻與持一觴

袖中有短篇是君舊所吟所吟非別曲乃是邊塞音自言無好懷
愁如鍛羽禽朝成明妃歎暮悲蔡琰琴茲言踰歲月故人猶在心
何期一出關愁絕真難禁白日淡無暉風光慘欲陰縱當歸故鄉
坐見鬢髮侵死生況未保莫惜商與參

奉祝鄒程邛母潘太夫人

今之董與鄒昔之孔與李知交歷累代行誼各相砥子弟稟義方
式穀幸能似兩家通德門夙昔矜閭里豈惟庭訓切闈教由母氏
惟盜與祇謨膠漆庶云擬齊名素忝竊越今已二紀登堂肅拜跪
於母實猶子具知母德賢述之難屈指母家本荆溪族望崔盧比
少卿與別駕尤濟華宗美聿生太夫人根源自芝醴習禮復明詩
淑慎嫻儀軌于歸鄒府君伉儷稱嘉止梁孟媿風徽郝鍾難娣姒
如賓作內助德音歌樂只殊忘朱凡貴所性薄華靡門戶更善持

一一見條理堂前操井曰堂上奉盤匱惟翁憲使公望如山岳峙
惟姑劉恭人壺儀稱女士豕婦殊難爲偏能獲敬禮令譽出尊章
人言盜聞此無何邁時艱府君坐奇累日散于黃金佐之簪與珥
中門無怨嗟視之如棄屣但聞杼軸餘辛苦常訓鯉廣被每親縫
求鄰不待徙剝薦敬留賓高賢爭納履令子本名才况兼母德庇
所以振雕翎獨向雲中起談天譽匪誇賦雪才逾綺狎主中原盟
聲名後進倚屢奉公車徵戊戌登上第射策玉墀前曳步金閨裏

先皇識姓名同籍隨鞭弭書成懸國門薄海輦金市歸來侍高
堂慈顏稍加喜一官猶未拜家食謀甘旨非久秩崇班歷錄賜緋
紫人言非母教飛騰詎如是維母曰祇謨微名竟何恃置身不再
契當爲而所恥勵志不孔顏當爲而所鄙吾老逼桑榆眼中時望
爾謨也聞斯言書紳敬自矢天人學已竟霖雨時堪俟庶幾慰母
懷日夕加餐匕甲子今一週登堂應酌兕舞看斑斕衣食煮雕胡
米含飴一哺孫漸見成杞梓衰封表女宗行刻恩綸璽爲樂未渠

正讀書五十二
三
央懸知集嘉社門庭附末行謨也盜知己得奉良友箴如侍宣文
几私淑有自來慈懷諒難已摛此頌坤儀欲備張華史幸逢設悅
辰陳之祝兒齒千秋以爲期瑤觴自今始

贈黃雲孫

羣仙良讌會乃在十二樓飄飄下九天云從黃子遊借問黃子誰
雲孫莫與傳三至春明門上書未見收男兒不得意酌酒弄篴篥
歸來三婦豔玉堂唱未酬朱顏映皓手紅燭照明眸會須到帝鄉
但非今所求欲呼王子晉眷言結綢繆

贈黃初子

獨坐忽有思秋風生淥水步出城東門矯首法王寺寂寞草太玄
我友適居此風姿何雕朗珠玉照神理江夏本無雙汪波千頃似
疇昔結綢繆唱和發妙旨白頭冀勿忘惠心託君子

贈毛卓人

風流已雲散大雅誰復陳卓人天下才振起在毘陵一朝被註誤

封事遂列名

帝閣遠莫叩誰憐草莽臣患難密友欺含涕出傾

城天子好文學讀賦思其人下詔許不死說教皖湖濱遺我相
思曲悵悵不忍聽何時復攜手與君論交情

戊申夏日紀事百韻

康熙七紀年

皇帝親政肅恭默運天樞維持奠坤軸宮中奏雲

門天下調玉燭君臣方泰交變理諒有屬職貢勤諸王維藩布羣

牧仰瞻映垣宿俯列視岳瀆王鈇隕越況敢滋反覆桓桓天討

師開拓震邊腹甲光射雲鱗山脊齊金鏃蜃樓終散氣精衛空銜

木海水久不波鬼方亦已旭星分九野外一一同風俗堯衢歌漸

起洛鼎年堪卜龜龍宜負瑞景卿應爲福如何災屢告翻使杞憂

蓄四月當下旬日躔畢度宿觜參井鬼柳歷至六月燠麗天不改

耀方出虞淵浴末曜宜避藏太白晝偏矚自井歷至翼近與同南

陸咫尺未違顏光燄不斂東申見漸午見有如夸父逐聞之天官

家強兵恐弱歷又云星所臨其下起兵速朱鳥之所分秦周與楚

服此地皆神州國恩人濡沐因疑不足畏聊且寬頰高厚自生
成何至苦踏踟誰知地欲浮震蕩在忽倏昨來無錫縣大火昏中
煜枕簟臥不安颯颯匡牀竹起坐書數行俄驚眩頭目梁棟勢欲
傾屋瓦聲相觸偏側趨階除倉皇走僮僕俱言蕩若舟誰能立如
鵠固將任游移還防竟圻副須臾得稍定河水猶育育數日多傳
聞方知徧南隩或云絕維星或云斷鼈足荒談未足憑徵信在史
牘維周伯陽父咨嗟謂陽伏劉向對豈誣京房占匪讎越陰李固
誠踰制蔡邕告載觀玉曆經詳明更足錄今時方承平上下稱雍
穆豈干陰陽和高深易陵谷不期經時內災氛如此數竊知皇天
心警戒實諄篤倚伏各有機吉凶遞相續廟廷修弭至轉移知若
穀莫言已治安憂盛方能穀天聽靡不周猶虞未委曲皇綱張八
埏或者遺細縵毋乃刑措遲謳歌聞訟獄得無撻伐久神武過誅
戮光華雲日下尙有溝壑辱祇因傷穀賤民今苦無祿千里黃雲
鋪江南小麥熟穫者婦與姑謂將得噉粥莓雨經三旬浸淫芽與

族千餘新制錢易去竟十斛夏稅并秋糧徵已逾其六頗知官府
法里長正穀觶新秧未及插敝袴不敢贖行將易銀輸所冀免桎
梏道逢縣中胥遙望怒可掬嘗問來何遲令之足踏踟徐言對簿
日催比代敲扑并屬諸曹吏雜派比催督使言當卽償遲能俟收
粟我腹况已飢爾銀勿投積竦惶手自致淚下何簌簌歸來顧婦
子又復空杼柚漫有稻梁謀不如侶雞鶩皮骨真僅存欲剗已無
肉比戶同悲悽非徒一路哭有券望誰投有兒向誰鬻黃鳥飲啄
艱蟬蛸時日促寄愁天欲墜埋憂地偏縮皇天還睠顧惻惻哀惻
獨眾志顛蒼穹憂懣成天椽計惟請詔蠲司農奈仰屋額餉日六
萬轉運同車輓廟算本亟需非盡有司酷庶幾大臣賢盱衡在當
局洞此部屋情進爲黼座勛相期舞干羽務使偃旄纛還矢太廟
中歸馬華山麓蒟醬旣南來毋勤白狼鹿藻席但垂裳冀階惟輯
玉薰風破八壺湛露沾百族將相善調和中外常親睦詩書致太
平大化出庠塾耕鑿遂羣生久之返純樸箕畢好無違方輿咸從

欲照臨既不遺鞏固基尤築挽回補造化行見天心復紫炁融祥
光黃圖集符籙漢影互玉繩江波澄鳴綠儀天鶯鸞鳴入囿麒麟
畜凡蒙覆載恩均陳萬年祝

青青河畔草寄雲孫

青青河畔草經霜已萎黃望望同心人經年不相忘憶昔束髮時
卽登君子堂東西兩分手流宕在他鄉胡越不相知鴛鴦不成行
欲寄黃金鈕南望何茫茫

寄惠州沈推官漸卿

明月入我帷披衣中夜起歷歷記平生慨焉念知己先人昔遊宦
耑城漢江止賢聲達閭闔才望震鄩歲在戊子秋分校三楚士
遴拔皆異材梗楠與杞梓就中最沈生文章軼左史數言忘忌諱
幾爲主者嘗特以去就爭空羣得千里憐才豈望報古道夙相矢
勛子厚自期置身稷契比時余方弱冠從君采江芷託契自陳雷
通家逾孔李拭目望飛騰君去燕昭市敝裘余落拓遠望徒倚徙

幸蒙喬樹蔭梓植猶堪倚誰知事變遷今昔成流駛先人晉司空
一官領都水奉命隄白河胼胝無寧晷王事獨賢勞遂棄予小子
旅櫬泊荒天靈旗翻野淚承恩許馳傳驛卒難驅使歸來營馬鬣
負土初成壘市上早負薪田閒行牧豕逢君車騎遊溫州作司理
過我謁先祠椒漿一何泚我母聞君來呼天告靈几云汝昔憐生
可知今在此登堂及展拜涕泗尤難已傳言出中門我今方病趾
譬如四下日行薄虞淵底窳寅稍戍長幸得謀甘旨錫餘髻昨卷
提攜當累爾君言敬奉命圖報今伊始母本罹憂人聞之頗色喜
詎意君行後展轉依牀第去冬十一月哀哀竟失恃總帳火常寒
芒鞋手自庀來有責券人賣無丸藥婢篋中冠帔外檢點惟麻屨
弔客縱盈千襄事誰經紀賻贈不敢求恐爲先德累非無二頃在
石田久罷耜胥吏時呼門親魂恐失七兄弟兩三人脈脈各相視
凄清苦塊上共此姜肱被幼弟更伶仃親亡猶嚙指知君今宦粵
平反事嘉肺廉吏素所期分甘或難擬又念昔登堂君言尙在耳

諒君勿相忘將著遠遊履出門更踟躕回首空瞻吧嬰車猶在寢
行行復中止呼我蒼頭奴攜我一端綺遠投尺素書疊之作雙鯉
縹緲羅浮山故人顏若咫庶幾惠德音臨風長伫俟

正誼堂詩集五言古之二

正誼堂詩集

七言古

襄陽元宵行

漢皋玉珮煙波冷冰輪一片遙相映似出驚秋班女紈疑懸照膽
秦王鏡春宵激灩不知寒火耀千門雪裏看還停銀箭金壺響乍
聽鷓絃象板喧一時三市明如練蚌鏡龍燭高燒徧冠蓋城中火
鳳飛銅鞮坊外銀花燄九華燧燧五枝多臺榭登臨望若何十萬
鮫珠明綺戶三千犀炬照銀河大隄女唱襄樊樂大隄兒唱習池
歌聯臂隄頭絲和竹大隄兒女人如玉麝透紅裙染石榴風吹綠
幘驅金犢綠幘紅裙處處游相逢鏡下不含羞同看寶燧珊瑚樹
半入雕楹玳瑁樓樓上酒傾青玉案樓前人脫紫貂裘毼毼歌舞
翻回鶻絲管清觴醉莫愁鳳脰光融金半臂蘭脂采映錦纏頭玉
蚪春水初聞瀉屏風更出吹簫者鏡影遙通翡翠簾月華欲溼鴛
鴦瓦此時都督大將軍緩帶閒遊從若雲桃花之馬七萌車往來

百隊何紛紛紛紛來往行人羨紅顏麗服分明見夾道材官柳葉
衣戎裝舞女蓮花劍香風吹起徧銅街紫絲步障不教遮夫人城
外天如水娘子軍中陣似霞吹殘楊柳金笳緩彈到琵琶玉勒斜
正逢鼙鼓喧都市舞燈少年齊袒臂九龍夜戰六鼉來眾裏爭看
角觝戲蕭梁舊院再徘徊又值中丞公燕開使者鳳凰池上客貴
寮鸚鵡座中才相逢今夕正歡娛北路魚弘南路徐秦女青箏趙
女瑟劉家碧玉石家珠四照花開嬌映面何須滅燭解羅襦聞歌
爭勸索郎酒換席重然嬾婦魚桓公北府猶寂寞庾亮南樓總不
如須臾漏下銅龍急車馬行人歸去疾素蟾影落獸樽空白鳳膏
銷鸞板歇劉琦臺畔曉煙青王粲樓前春草碧

較射歌

晴川萬里浪雲開黃鶴磯頭較射回手持白雁向客誇相與共酌
黃金杯客也舉杯笑不止爲言長鎗大劍非爾事我本居遼東游
俠少自喜十歲騎馬復射鵬入關以來吾老矣頗聞南人重詞賦

翩翩不慣弓與矢君當早上昭王臺青鳳之毫博金紫吁嗟世事
客不知十年讀書徒我欺家無千黃金凌雲徒爾爲昨日銅鞮來
登樓重晞噓見有雕弧銀戟百隊擁乃是荆襄都督之高車紫髯
玉面何似儻紅韁駿馬駝明珠言是隆中射生歸手格兩熊編虎
鬚後有石城女兒好身手齊著貂蟬坐綵輿玄兔將軍開讌待黑
貂客子道旁趨道旁忽自失歸來欲投筆君不見山東英妙請長
纓茂陵才人擁旄節袞袞諸公開府居南朝上將多詞客我有明
月萬石弓何不讀書兼射獵會須看我鐵裊鋒訪我三河五陵之
舊遊射書聊城中射虎南山頭從軍決勝百步內不久便當拜徹
侯入朝結羽林出鎮開青油溫嶠南行果得志李陵北去何足憂
客淚沾巾更橫說黃陵廟前曾對敵一朝陷陣付獄吏此時自悔
穿楊葉可憐猿臂隴西人罷官空射藍田石是時子亦憂填胸醉
向江頭歌白雪

桃源圖歌題贈處士

我聞桃源人先世曾避秦此間不知漢魏晉千載猶作周遺民誰
何漁人來問津垂髫黃髮驚逡巡殺雞作食情倏親池中有魚亦
可捕咄哉何不結爲鄰又聞桃源人先世攜妻子漁人欲歸應爲
此告之太守良可已何如黃山一老翁青鞋黃帽多仙風有子曳
杖相追從置身早在桃源中君不見桃源中千樹萬樹參差紅一
谿一壑皆奇蹤游仙尙憶胡麻飯更有天台路可通

惜別辭

楊柳風吹無力偏能漾愁思令人長相憶憶昔與君初見時妾方
十二學支機兩小無嫌長作伴脈脈中宵乍有思從此花開復花
落蕭郎長自來妝閣刻韻同題白練裙留歡卻卸桃花絡夜深明
月上高樓抱郎膝上聽絃索如何阿母遠相攜攜去西湖西復西
西湖楊柳正依依適君送妾問歸期香奩細物各贈貽湯湯錦水
露春衣問妾何所往天南采荔枝采得一支雙蒂結隴頭欲寄無
消息縱使青鴻寄得歸恐到江南變顏色吁嗟顏色不常好紅顏

容易鏡中老妾始別君十五餘此時自謂如花姣人生會有別離
時所恨不遲與不早但得君家無兩意姑酌金罍破煩惱不期千
里賦歸歎聞君閨中別自有明珠芙蓉相對正歡娛琥珀觴前弄
紫竿妾展梨雲夜致書索妾舊時青珉香唾孟還君舊時紅玉雙
鯉魚焚君舊時金地藕絲襦書成還自裂中心更轉側青雀較歸
遲不關君薄德情深何必共綺衾以妾視君還似昔一旦知君有
遠行倚樓猶自傷離別

江寧送陸生歸里

君不見叔敖有子負薪嘯搖頭優孟世亦稀又不見任昉蘭臺淹
沒時公子西華冬葛衣人生富貴忽朝露人情翻覆難似故秦淮
女兒莫唱歌座中聽我歌行路昔有龍江陸使君薦賢最多天下
聞一辭華屋歸邱墳庭前玉樹無顏色流落秦淮誰更憐袖中有
刺空磨滅幕府山頭日正斜陸郎徒步今還家嗚呼陸郎徒步今
還家

春明行

東風吹徧長隄綠花光處處紅如簇嬌鳥爭唳桃李蹊遊人解唱
靡蕪曲一時兒女炫風流紛紛輕薄學嬌羞倡家晝抱銀箏柱蕩
子春眠繡被舟城中寶鑰三千戶苑內珠簾十二樓錦天褥地游
絲絡三春風景正無愁此時才人醉金谷此時嬌女辭金屋載酒
方塘玉勒遲蹋青遠陌弓趺足畫檝輕隨步障絲飛花故墮釵鈿
玉須臾畫槩東西開飛花猶自逐人來夾道薔薇迎綺袖垂隄楊
柳隱樓臺楊柳樓臺蘭麝徧雕梁玳瑁巢新燕中有佳人墮馬妝
憑闌獨坐教人見何處狂奴濫醉來玉窗前折紅玫瑰忽逢小婢
將人拒投梭折齒真堪哀更有朱門大道尙書第翩翩公子聯車
騎大兄白板拜期門小弟黃金隸博士調笑爭開狎客筵縱橫笑
入胡姬市一朝遊戲上東門平頭奴手擎風箏赤繩百丈飛上天
宛如白鶴凌青雲嬌慵紫玉並隨游鳳凰之衫蛺蝶裙又聞城北
葳蕤院陽春方當二月半閨中笑賭紫羅囊花下私遺紅錦段銅

盤膩燭醉秦宮繡閣熏香藏小椽翹風弟子獨空房說與他人多
感傷吁嗟乎春花一年開一度花開花落同朝露眼底紛紛作樂
人一時總爲春風誤獨坐閒庭手玉杯花飛不到董生帷祇憐千
載悠悠事一卷書成更示誰

疇昔行輓蔡威函太守

太守諱鳳武進人李自成陷河南死之

博浪城頭沙石徙夷門古道風塵起酒酣臥聽抱關人慷慨爲言
疇昔事疇昔中原戰馬愁黃雲迸落古梁州青砧月冷孤城堞白
練霜寒上將裘大梁使君多激烈夜半軍中聞威栗登樓難效庾
元規起舞還同劉越石手提魚腸悲且號欲奠燕京如朝食朱亥
爲前驅侯嬴作上客一時意氣摧三軍羽如日月陣如雲望援不
道無男子甲光燐燐鼓聲死周府魂消浚水邊王孫血濺檻車裏
使君白首亦何歸平陵翟義愁難已聽罷朝來弔古邱戰場荒草
幾春秋惟有金梁橋下水祇今依舊赴東流

赴劉瑞公介公兩孝廉第餞席示詩有贈

吾黨詩壇虎視雄誰其健者非董公同邑還稱鄒祇謨陽羨獨數
陳維崧劉家兄弟初下筆結構便欲與之敵長篇天矯短篇練近
來亦頗稱詩傑華堂設讌送我行春風二月花光明酒酣賦別何
慷慨晨風欲發難爲情吁嗟劉郎慎自愛束髮交君十餘載結客
人稱四公子論材不數程李輩鄉里相看忌者多飛龍小兒操短
戈諸君莫漫題鸚鵡得意早垂腰下組不爾如我汗漫遊濁酒高
歌氣如虎

袁重其以其年所贈長歌索和漫成

醉來碎擊珊瑚樹座上彈箏箏且住我昔江南遊俠兒出入黃鞵
鶴尾袴壯心早願勒燕然歸來便欲求昇天關門棄繻非異日子
晉吹笙本少年結交便飲壚頭酒壚頭女兒好身手道上相逢短
老翁陸博酣歌無不有豈知往事徒乖張數奇不遇漢高皇豈知
上書仍落拓酒徒還在舊高陽世事悠悠等射覆不如高唱江南
曲篋裘塵柄嘯胡牀隱囊紗帽彈棋局今歲江南正落花花時嬾

載碧油車蒯侯落拓澄江道相逢握手空咨嗟君不聽城頭月落
烏號苦君不見經天明月沈珠浦同是悲歌慷慨人愁多且看俞
兒舞腰下何須大宛刀樽前安用五陵豪與君且作銀牀客醉看
山中桂樹高歌罷陳生亦潦倒眼中不但袁生老

對雪歌病中答其年許士見贈

董生臥病獨長歎故人遙勸加餐飯孟冬十月雪紛飛玉樹冰花
映復帳有客贈我白雪歌當風讀之倍惆悵前年賦雪珠樓中繡
袷圍爐獸炭紅茱萸小女捧金鐘笑疊錦褥雙芙蓉更聽清歌入
紫宮聖郎樂府贈妖童醉攜賓客呼酒龍陸博得梟何其雄無端
又作長途賦去年賦雪寒江路陽臺宮館玉嵯峨茫茫萬里銀濤
怒客中三襲錦綵裘乘駿直入將軍府西祀毳帳開華筵駝峰赤
鯉葡萄露二十四枝畫戟前胡雛對客加窮袴故鄉雖遠亦足豪
意氣紛紛真不數我今錮疾終朝眠終朝對雪殊可憐昔日美人
過我前紅冰玉筍何漣漣疑有我有故人善著書觀濤欲往從枚

乘念此鬱鬱難久居
花飛篇病中酬李賓侯過訪

三月三日花正飛長洲古苑煙霏微道逢李郎紅袷衣來向橫塘
銀幘敬是時羣公良讌會香駿青雀來飛蓋紫玉墳頭士女筵王
珣宅畔笙歌隊士女笙歌正冶遊詞客同登雲女舟謝萬蘭亭詩
早就王融曲水序紛投今日李郎訪我來毘陵我方臥病鶴文茵
回首吳閶行樂事意氣縱橫空復情吁嗟聚散何足論一代紅顏
有時盡君不見虎邱座上孫元凱老死虞山人共慨又不見楊焯
侯檠更少年玉樹俱埋青草邊君行正值金風冷會須強起爲君
飲孫與侯楊皆一時聞人

尤將軍歌

將軍一世之英豪當年屠狗復吹簫結客五陵漆與膠舞陽年少
非其曹慷慨任俠聞於朝一起王家擁旌旄是時烽火息四郊青
油幕府臨漢皋前擁綠珠後翠翹左攜碧玉右櫻桃習池開燕羅

珍肴珀卮金盃酌葡萄甃歌舞何妖嬈舉鞭歸去月已高忽聞
南漳賊勢橫且驕挽我鞬中萬石之烏號策我殿中千里之蒲稍
披我三十重鎧之戰袍出門不辭金屋嬌關山鬼哭聲蕭蕭三戰
三北義勿逃目光如炬罵不撓天地慘烈山川搖誰言一死輕鴻
毛可憐香幄望歸鏡猶夢將軍進秩封驃姚

懷玉蚪叔

叔也昔當年少時落拓風塵頗好奇獻賦初教驚武帝千金不惜
贖文姬乘駟重歸故鄉里是時予亦耽羅綺共聽新曲顧妖姬同
把芳樽調小史長醉春風嘉樹園吳氏相攜秋月虎邱船挂釵夜
夜珠簾畔盤馬朝朝綺閣前珠簾綺閣空留恨紫囊笑賭還相贈
一朝羅袖拂臣衣真知綠綺無情甚垂手能令夫婿憐畫眉應得
君王問回首歡娛又幾年皇華今日惹春煙羅敷並領東方騎文
舉新開北海筵寧知予作東山客彈鋏依然無酒錢
卽墨同諸公大集席上贈沈將軍

卽墨大夫留客住海內賢豪得相遇一堂楚舞閒齊謳秦箏燕筑
越箜篌諸公長技無不有吳人堅坐惟飲酒酒杯到手各忘家人
生何必怨天涯故將不妨逢醉尉書生落拓還相對吁嗟沈公何
所求華林閣勳不必羨通天臺畔亦無愁吾曹失意祇痛飲吾曹
痛飲休教醒明朝分手行路難不如共會蓬萊頂

席上看弄丸歌

臨淄卽墨天下聞鬪雞走狗紛如雲我來作客多交游脣舌不減
樓君卿銀花之脯入帶魚主人邀我飲半醺當筵少年擊鼉鼓更
一少年袒臂舞足下紅錦鞞腰閒五色組手持一丸摩雲端一丸
未落復一丸雙丸將落承以頂須臾重入雲中看更出七丸在肘
後兩手承蝸左復右旁有少年拍手嗤大言此伎安足奇摩頂至
地身倒懸以足弄丸目不施七丸上下聲相擊擊聲一依鼓爲節
是時我醉不欲眠紛紛羅袖屏前列
酒酣歌同劉震修陳其年集賡明處聽曲作

董生酒酣向客呼主人瀟灑眞吾徒季心任俠關中少洗馬風流
天下無張鐙置酒召我飲陳劉諸子皆歌烏主人向客亦潦倒當
筵擊碎玉珊瑚一時座上看如意月明正下瓊樓臺霍家奴子年
十三夜深私抱箜篌至重點酡蘇上綺樓圍鑪還襲白氍裘喚來
樽前歌一曲花檀低拍聲悠悠董生聞歌復大醉爲言十年多慷
慨憶從玉樹豔歌傳朱雀高桁風物改君不見新開大府樹牙旗
廝養從軍賜錦衣酪漿服匿華堂讌錦旆席地分朱提惟有江東
詞客飄零甚細草悲歌人不知我生失意行如此安能行歎坐復
思他日終當取侯印公平行樂須及時言罷主人擊大鼓陳登自
臥劉琨舞

碧玉歌

誰家少女擅妖嬈舊住銀塘紅板橋院內櫻桃垂綺戶隄邊楊柳
繫輕舸家風最倚中郎重門戶堪從絡秀驕憶昔生年十四五廣
額豐頤好眉顰牡丹新髻入盤迴蓮瓣織鞋三寸楚輕如驚燕度

花飛豔如彩鳳當風舞早知炊飯進劉晨詎便聞香防賈午可憐
白晳他家郎父在金門母在堂娶妻更得劉碧玉花葉葉自相
當不道七丸乘醉進玉樹飄風委北邙豈惹遺胎嫌太早鴛鴦舊
夢本難忘薰籠依舊葡萄被粧枕猶然玳瑁牀白寫祭夫篇尙在
雞聲便逐汝南王奔來不隔文君肆窺去原無宋玉牆階前董偃
嬌能拜花底秦宮醉更狂妝成每過瑤光寺繡罷常攜濯錦坊握
索時時寬袖袂步虛夜夜捉迷藏消魂更有留人處冠玉人來夜
深語帳外流蘇響一聲低眸就把千金許鴨鑪香篆曉氤氳抱日
嬌郎癡若雲行蹤便了儻常見信誓芳姿婢暗聞漫道小郎屬新
婦寧知新婦配參軍一朝鸚鵡叨叨說射鳥兒來空立雪生恐桃
花結子貪歸窻索向姑嫜別腰肢約束頻收翻悔當初采石榴
入門見母牽衣泣願母同登雲母舟水上洛神縹緲去感甄先自
淚長流藍橋卻遇他鄉客正自安仁悼亡日手致區區八餅金偏
喜佳人能再得猗嗟往事不堪思從此堅心尙未遲回嗚欲向新

人笑儻憶當年初嫁時

七夕行贈范赤生訓導

昔年七夕金陵游曾過齊武穿鍼樓相逢賓客皆風流綈袍先生
坐上頭爾時意氣干斗牛那數乘槎博望侯誰知歲月奔如流吾
曹仍敝黑貂裘先生廷對雖見收朱雀桁前無八駟廣文一席寒
如秋子亦飄零相對愁先生先生慎勿愁意氣聲名橫九州一朝
落筆中書堂諸公袞袞誰與儔君家自上華林閣君家自有五湖
舟功成賦歸猶未晚那不羨爾黃金鉤

寄贈葉處士

與君相逢在暨陽我年十九才飛揚飲酒同過竟陵邸作人不畏
瑯琊王別來十載不相見花開桂樹時相念卻因相念轉相憐區
區往事都憶徧落拓誰堪醉漸醒蹉跎難說貧非賤我今三十鬢
已華聞君五十猶能健陳思莫便求昇天宏農莫便詠遊仙不如
企腳彈琵琶北窗高歌倦卽眠君不見白榆蕭蕭天上落仙人樓

居亦不樂又不見海市橫空蜃氣消西山木石亦徒勞君今對酒
勿自苦膝前況有雙鳳舞人生爲樂未渠央多因往事生悲傷公
乎公乎盡一觴莫憶相逢在暨陽

元日奉壽祖姑黃母太孺人七十

吾家七葉稱通德生女亦足矜門闕吾家七十老祖姑闔內徽音
更藉藉我聞祖姑昔在家生長富貴無嬌奢太傅闈門原習禮令
嫻清拔何足誇一朝出閣歸江夏名門世德盜相亞夫壻還稱千
頃陂諸兒不在黃童下牛衣相對鹿車遊井臼辛勤易白頭幸得
綵衣聯袂舞少子先乘五色虬往歲春明登上第新授郎官宰百
里陞見爭傳禮數優假歸更得慈顏喜潘輿奉母入花中姜被隨
兄歸嶺際何須更賜複錦裙何須更煮雕胡米我亦門庭附末行
年年元日進稱觴每爲細述高曾事勛我置身日月傍我今有母
鬢已霜何時捧檄登高堂

正誼堂詩集七言古之一

正誼堂詩集

七言古二

永樂入駿圖歌

按燕王靖難先後所乘入馬曰赤兔龍駒烏兔飛兔黃銀褐
棗騮黃馬皆臨陣被箭而燕王不傷馬不及於斃及卽位繪爲
八駿圖藏內府三百年甲申閒前驍騎李將軍得於長安市上
近從李所展玩因感革除中諸將雖甚庸孱天下兵力尙能使
燕王屢及危蹶設當一鏃事未可知咫尺之間會有天意況古
來殿中一筑沙上一椎粹望成功宜其難矣隨悉其所乘之時
與所過之地按圖差次而爲之歌

赤兔霹靂矯若驚渾身汗血桃花明白溝河頭雄懸城先後突陣
奔雷霆還疑火擊金作聲卽爾神物變化成龍駒噴沙雙眼瞪似
嘶不嘶怒未平拳毛瘦削霜蹏輕渡河冰合鄭村行景隆豎子無
安營烏兔一匹鐵錚錚東昌獨殿接短兵負護雄主歸北平乃知

爾是房星精飛兔騰達千里程往來夾河如流星金羈玉勒齧不成鬣張皆裂氣憤盈盛庸之軍誰敢櫻飛黃柘色微帶頰跳脫超忽雲中擎大風颯颯吹其纓藁城一蹶平榛荆銀褐昂昂吭欲鳴玉花獅子不足名霜毫雪練皎若瑩浮河夜渡如遊鯨東炬四舉不見形真龍乃得空中行棗騮棗騮爾爲駢小河北板勢幾傾被槩欲蹶不閃睛展看猶疑毛羽腥一躍入陣何崢嶸黃馬橫奇勢欲爭戰渴不飲河水清翻身起視前行旌靈壁一捷大勢并旋趨金川罷鼓鉦此馬牽來玉作鈴與前七馬俱縱橫至今圖畫猶如生

輓惲中書香山先生

香山子大父行也而與予爲忘年交乙未春爲鄒九揖索畫於翁翁并圖數幅贈予曰行年七十矣索爾長歌爲壽以報我予時許諾會客遊山東歸聞翁已亡不勝山陽聞笛之悲竊比延陵挂劍之意慨然有作示蔣馭鹿馭鹿其甥也

昔在神宗全盛日承平猶重文章伯輦下貴游聯綺紵諸王邸第張琴瑟翁也年少誇江南揮塵高談霏玉屑興到斜書白練裙有時醉掃丹青筆車騎雍容出里門五侯七貴爭虛席黃金上壽笑不辭一揮便買邯鄲妾落拓浮名四十年數奇不得生羽翼可憐老大逢百憂親見銅駝臥荆棘相國洪公鎮石頭翁也從軍作記室曳裾重比阮公瑜馬上飛書馳羽檄一朝奪爾鳳凰池棄官自號香山客感慨曾登念北樓予亦扁舟過采石是時冠蓋停江濱結駟連鑣殊絡繹眾中顧謂董生賢忘年末契稱膠漆把酒論詩我更狂謂翁元暉我太白十年蹤跡各風塵竭來往往無消息今歲春正贈我畫白首童童更非昔自言七十無所求但願董生歌一什誰知蓬海賦歸來欲聽琴聲難再得遺文空有茂陵書中涓不到相如宅丈夫葬不得玉魚死向邛山無氣色何人蒿里解憐才道旁惟有羊曇泣放生池歌爲冒辟疆賦

我聞東臯冒大夫鑿池百丈成清湖前臨水繪菴遙對小三吾
大夫昔時臨此池抽簪初製遂初衣高明共集芙蓉府有時曲水
共題詩此日池亭方極盛清歌起處遊魚聽大魚洋洋紅鬣飛小
魚育育朱欄映與人無爭亦無患川觀頗靜濠梁興誰知盛衰會
有時四十年來事總非卽在此魚數亦阨東鄰桔槔澤若渴入釜
誰爲解網思上書應念過泣河大夫子孫才且賢追思往事心惘
然有客聞之彈鋏前請君且食槎頭鱖昆明太液稱濯錦蓮房菰
米波漂盡又不見王濬樓船下大江江中鐵鎖餘紅燼

吁嗟行贈杭州范性華

吁嗟乎婦人醇酒非得已英雄寄託良有以范生磊落天下才談
經說劍生風雷譬如昂昂千里驥追風欲上昭王臺生前不得燕
市價縱使黃金換骨亦可哀悲歌落拓風塵裏北窗琵琶雙腳企
調高終見和人稀漫向秦樓覓知己相逢有女擅傾城一顧偏能
識長卿鶉衣笑對銀華鏡松柏同心早結成著書何必咸陽市要

路何須許與史千秋萬歲亦區區瑯琊祇合爲情死君不見陸續
檻車詣洛陽謂麗京城門校尉索范滂謂文白又不見吳生一官不稱
意悲歌行路亦自傷謂錦由來盛名不可負崎嶇阨塞固其常何
如俛仰玉臺側鬢鬢之鬚美人將有時濫醉作狂歌蒯緱高彈和
錦瑟近得武陵音信無君今不往胡爲乎直待功成始泛湖君家
少伯非良圖

惲生歌

眼中之人誰國士吾見惲生兄與弟法護僧彌各自佳釋奴龍子
俱千里昔日陳生與劉生廣明介公爲子極道惲駢名相逢映山堂廣明
書一諾許平生卽今分手東西路蘇李依依自有情誰知華也更
奇特髻時早號文章伯草長西堂應見思莫道火攻原下策昨夜
春風花滿枝正值諸君高會時五陵豪俠銀駿集四姓交遊筍屐
齊一時矯矯多龍鳳劣者猶然虎豹姿就中華也最特出珠玉琳
瑯光熠熠願揖蘭臺聚裏人指揮稷館門前客惲生惲生慰我思

十年相士今得之為君醉倒珊瑚危不惜與君相見遲但惜吾衰
久棄置追隨恐為年少嗤執君之手與君說願君結交崇令德勿
學河東市上兒拍張祖臂明膠漆君不見竇田失意一杯酒有客
居閒漫作色又不見兩部甘陵黨禍興有客西行事漸釋況君夙
昔重友于方當讓棗推梨日延平之劍合浦珠若使終分豈神物
君家兄弟略相當君家兄弟無相忘

正誼堂詩集七言古之二

正誼堂詩集

五言律

奉侍家君同邸襄都御史趙公都督張公副使蘇公游習家池席
上命賦詩紀事五首

羣盜銷亡日官僚暇豫時登樓清嘯冷露晞出遊遲共策山公馬
來臨習郁池親顏今有喜授簡一題詩

此地名園最高陽記勝遊樓臺成寂寞泉石自清幽上下雙碑古
奔湍萬壑秋羣公無限興晉代失風流

槎編出漢水杜酒遞宜城給事官廚美當筵妓樂新山容開繡障
泉響雜銀箏恰遇栽花後春風處處生

登臨殊不盡飛蓋此還亭澗細通渠綠峯高入漢青興來杯易把
愁入醉難醒又聽樓船發書生擬勒銘

兒童拍手處歸旆正紛紛獵馬驚秋燒漁舟狎暮雲安危心自卜
出處事全分早濟蒼生了還山侶鶴羣

襄陽雜感六首

由來名勝地登眺興全孤久客憐公子多愁念大夫堠煙千里接
爨火一村無漫說從親樂高堂鬢已枯
襄國賢王最當年事已非寢園薨兔窟宮殿亂鴉飛漠漠斜陽壘
蕭蕭大將旗曾塗肝腦處草色怪偏肥
征南出禁旅八月渡襄州上將多龍種孤兒隸虎頭軍容赤羽蔽
陣氣黑雲浮聞向瀟湘去休令帝女愁
萬山峯色霽影入漢江流解珮迴仙女沈碑憶杜侯風輕白鷁下
雲擁夜珠浮欲賦蕭梁事才人散綺樓
落日吹笳急歸途信馬過檀溪青草沒峴嶺白雲多幕府方傳檄
巖城早枕戈誰家遊冶子還唱大隄歌
不盡登臨意重來王粲樓空山千里暝畫角一聲秋耆舊今誰在
繁華擬夢遊江南消息斷惆悵大刀頭
贈張都督歌妓

楚王宮館在猶自望行雲夜月茱萸帳春風蛺蝶裙心雖憐客子
身已屬將軍莫度雙聲曲悲笳處處聞

漢江晚泊時將賦歸

客子行何畏天涯一敝裘滿傾桑落酒醉上木蘭舟暮氣來千嶂
孤雲薄九秋高堂今夜夢應說旅人愁

奉呈王覺斯先生二首

時先生代祭舜陵取道襄陽還朝為家君作

聖主隆殷祀彤廷冊命加定知雋稷契故遣答重華雲擁瀟湘旆
風清江漢槎歸朝今信宿父老更相遮

不朽文章事先生望獨尊累朝登虎觀一代仰龍門通書猶在

寅清

更明良賡喜起歸闕自承恩

薛子服哀辭四首

念爾華宗客家門不易忘大兄油碧乘小婦鬱金堂棣萼隨朝露
銀河落曉霜可憐神理盡無處覓胡香
當年賓從集風調獨君多荀令薰香坐王郎挽髻歌彈碁紅袖擁

射雉綠衣過今向卬山路蕭條爾奈何
憶昔會羣仙銀鐙列錦筵詩調周小史曲顧李延年奈此山陽笛
悽然蜀國絃舊時遊冶子何處酒樓眠
我困風塵久操音獨爾知傾心交郭泰折節事袁絲鶴去知何地
蘭摧又幾時年年山水畔孤月照相思

渡淮

黃河經北徙千里背淮流遠樹煙中暝長城天際浮人歸二三月
南去一孤舟何處王孫釣傷心古渡頭

春日登太平講寺浮圖

寺為齊高祖故宅

風雨經蕭寺登臨重有思昔年龍去後今日雁歸時野草南朝徧
天花西域奇莫從高處望鍾阜正淒其

寄山陰單駿如

聞說山陰好迴牆鏡裏旋萬家依碧樹百道下紅泉況有高賢在
應多勝事傳明年風雪夜須待子猷船

江陰雜興

立馬大江邊孤城倚碧天樓船三月火海島萬家煙白晝傳銀柝
黃金市寶鞭來朝聞閱武誰是請纓年

贈張繡虎

十載辭家久行藏混狗屠夷門曾結轡破豕復歸吳此去西陵近
人今北地無送君江水上對酒共歌烏

送卓火傳

落日大江流帆檣鏡裏遊君行多遠志花發動離愁埃火連瓜步
旌旗滿石頭前途多斷楫一上望鄉樓

渡黃河作

天上落黃河奔濤萬里波晴天兩岸出斜日片帆過試向中流望
能無擊楫歌山東淮北地大抵戰場多

海州晚發

再來鄰子國歸思正惻惻驛路潮聲裏山城海氣中重裘判帶露

匹馬慣嘶風日出知何處驚濤萬頃紅

藍太史尊公以華陽書院詩索和

誰住華陽院令人眼倍青先生稱舊雨令子傍長星喬木依然在

安車且暫停欲成封禪賦極目望雲亭

藍氏始祖侍郎公諱章始建書院故有喬木句

輓卽墨藍秀才妻

公子長安逝金徽憶故絃有懷同白日相見及黃泉雁落深閨外

鴉唳新冢前何當孝綽妹但草祭夫篇

蕩槳曲示齊客

吳女正憑樓吳兒正蕩舟鶯唳窗外過人在鏡中遊錦浪輕移岸

珠簾半上鉤盈盈含笑望牽纜故遲留

放船隨處好何必羨登仙秋月芙蓉渚春風楊柳天錦帆西子醉

繡被鄂君眠忽訝珠樓近移來水檻前

莫唱公無渡賓朋且共攜沙棠成繡楫雲母照潢池夾岸香風細

晴天畫浪遲長年家在水風浪不會知

席上贈薛尉

相對亦佳哉風流薛尉才卿雲百里徧細雨一尊開塞曲歌偏促

鄉音聽轉哀知君還自慰官舍近蓬萊

同周生上天井山觀龍穴

立馬望天崖崎嶇徑轉斜雲光明海嶠樹杪見人家龍去知何日

山深未落花一尊同席地客興自然賒

望田橫島

高閣一徘徊田橫安在哉魚龍驅石出風雨擁潮來海氣晴難定

山容暗復開忽聞金鼓振愁絕望鄉臺

卽墨雜作二首

曾聞封卽墨今日此流連作客依王吉傳經學鄭玄齊謳爭挾瑟

海市尙餘煙著屐勞山望泱泱接暮天

車馬經行處相逢酒盡傾空彈琴上曲誰念客中情日暮潮千里

天空鶴一聲登山還有約濫醉訪蓬瀛

喜顧與治過晤有贈

斯人今尚在把袂幾回看駿足違千里羊腸歷九盤莫揮名士涕
且進腐儒餐破產尋常事消遙有籜冠

席上分賦得燭

常比夜珠看翫膏熱絳盤滅時纓盡絕照處堦逾歡蠟散侯家暖
犀然水殿寒可憐孤客淚同汝落闌干

金陵客興八首

日日望歸休凭高思更愁潮迴三閣暮草長六朝秋王氣消牛首

軍聲滿石頭曳裾原未慣失計悔依劉

時因劉水部至金陵

絲管畫揚舫秦淮混客星人逢邀笛步

謂王望如書自玩鞭亭時當塗張中巖

至亂後高朋少愁來濁酒醒黃雲連紫禁不見一峯青

宮體還堪賦南朝行樂偏芳風吹玉樹纖月上金蓮劈紙宮如翰

調箏狎客筵如何人去盡深殿起寒煙

秋原勞望眼四野徧平蕪往事悲周顛孤忠憶卞壺青溪誰氏宅

玄武舊時湖欲買壚頭醉淒淒有暮鳥

城上起悲笳旄頭落日斜共炊鍾阜樹誰種邵平瓜板蕩原天意

登臨感物華浮生何足惜還問莫愁家

渡口名桃葉妖姬笑語聞方空飄溽暑屈戌閉行雲門外青絲鞵

牀頭黃戰裙新翻遼水曲絃管日紛紛

由來名勝地人物未蕭條揮塵烏衣巷鳴騶朱雀橋文章欣共託

黨錮禁全銷莫恨江湖闊清狂倚 聖朝

旅館弄篴篴相將問敝裘從軍無那病作客更逢秋存問憐知己

艱難念昔游那堪明又別風雨上孤舟

病中康小范村于皇願與治張與三修崖倪閣公程

惜只先後過問

正誼堂詩集五言律之一

正誼堂詩集

五言律

別舍弟文初十首

缺一

分手梁溪道傷心并此時父書空自讀門戶更難持齒長輕遊俠

家貧易別離敢辭前路遠今日是孤兒

有母方多病何人勸勉餐汝歸須寄語兄去不憂寒捧橘殷勤進

遺書子細看莫辭長碌碌好傍膝前歡

汝嫂行分婉生兒是家孫焚香宜告廟送果定盈門漫取紅花贖

頻將繡襖温慈顏應有喜破涕進盤飧

一一家門事親亡諒得知昔曾看讓棗今豈慮燃其祇抱遺經願

猶無瞑日期吾曹各努力何暇惜差池

無奈牽懷抱伶仃是七郎承歡日最短失怙痛偏長忍負牀前拜

因增地下傷先君易簣時曾命七弟拜靈為師還家同黽勉此意慎毋忘

庭訓猶能憶曾言閉戶優生前違式穀歿後見遺謀有客誇千騎

無錢買一邱浮名子已誤切莫問交游
去去頻回首知誰慰客蹤孝標原未遇優孟或難逢落拓悲彈鋏
因依願質春此行非得已莫說醉臨邛
白日猶狂走鐘餘更愴情先人三不朽孺子一無成握粟何能穀
探巢恐易傾中材逢世難珍重保身名
永夜臨流泣旋聽曉漏稀風高鴻雁斷水響鶻鴝飛數里猶回顧
孤帆望早歸士龍何忍笑照影是麻衣
雪夜雜感八首

臘月正流澌空庭下雪時窗明珠錯落樹老玉參差警夜雞聲早
隨行雁羽遲銜杯無限意卷幔一題詩

坐久更霏霏青鏡白板扉憐親添鶴鬢看婦擁牛衣粉堞寒更亂
瑤階曙色微有懷傷歲暮無事不調饑

痛哭司空沒高飛乏羽翰荒園遺燕壘生計託魚竿飄泊經三載
蒼茫集百端樂安公子在誰念葛衣寒

卻憶少年遊銀鐙玳瑁樓寒傾綠蟻酒醉吐紫髭裘曲奏氍毹煖
人歸跳脫留鱗鱗銅瓦雪凍徹不經愁

賓朋疇昔盛風雪不辭過標榜三君讓交遊四姓多爭成梁苑賦
能和郢中歌何意高車散西風老薜蘿

亦有金門客乘軒復過留迎寒方衣警乘輿不迴舟
雲孫詩士俱來留仙從長

安歸亦過愁向青山郭歌同白雪樓泥塗何敢怨目送鳳凰遊
撤鹽差可詠漫道祝年豐米價今方賤官通更苦窮誤人餘二頃
集澤念孤鴻未許袁安臥傷心問大東

箴策吹殘後登樓復縱看沾衣猶縞素下淚更闌干銷後應成溼
飛時敢畏寒先人封馬鬣坏土不曾乾

哭亡兒大酉十首

行年三十近抱子一生初更喜人來看都言父不如弱猶承襁褓

慧可託琴書何意當風折芳蘭竟未舒

呱呱中夜寂最苦夢初醒贏博埋無壙新安瘞有亭昔賢殊厚薄

弱骨忍飄零曉向東郊望還應借盞馨
憶客吳興日家書遠報來宗祧欣有寄行李任空同入抱嘵聲緩
聞呼笑口開如何長隕速顧影獨徘徊

西兒吾告汝汝小去誰依撮土荆棺沒荒天薤草希招魂應在側
奠乳莫啼饑可識西河淚瀟瀟灑練衣子在服中

爾祖空貽厥曾無見爾時縱存難免涕況歿那堪思玉樹長摧早
金環再覓遲幽明如不隔地下儻含飴

更苦高堂意憐予勸慰頻卻因悲少子轉覺累慈親泪滴三千里
先君卒後益隨

老母扶柩歸南年過五十春那堪多病日更失報劉人
而母初娠日來歸距一旬如賓接對久抱子笑言頻繡祿添鍼密
銀錢刻字新枉教當日喜懷抱此誰親

兩小匹門楣瑤環各自垂婚姻曾指腹長大望齊眉埋玉先憐汝
擎珠更許誰苦教章氏妹願女便傷悲兒聘莊女子章氏表姊所出

門衰誰倚藉吾意倦飛騰自夢旗鈴落常將汗血矜名鳥談詎解

字犬喚初應欲輟方回泣巾箱奈未曾

前生誠負爾翻悔不曾多戀戀情如此恩恩去若何麒麟應再降
麒麟或重過莫遣人長望雙雙鬢欲皤

范亦生招同諸公陪張明府
范叔吾忘分清樽每與同流連渾盡醉揖讓未須工入座來新尹

稱觥後數公漫將詞賦薦羞澀姓名通
熱

六月竟不雨彤雲垂四郊傷心禾稼盡揮汗卷書拋水檻知魚樂
風林羨鳥巢招呼良友意恐被汝南嘲

酬湯生雯倬芮生覲光餽寄食物
獨抱遊僊志誰遺藥一丸多君猶議食有母未加餐古道殷勤贈

來書子細看殊無奇字報深愧翠瑯玕
分賦得梨

庭院深沈閉秋來落實嘉疑餐金掌露勝嚼水晶瓜種出張公谷

名傳哀仲家當時曾取小為爾憶年華

蔣穎揆楊逢玉龔仲震諸丈過飲適龔介眉孝廉從長安歸枉顧

流連竟日遂有此詩二首

尚有吾徒在相逢酒漫傾窮塗忘慰藉醉眼見平生城郭鄉雲暗

關山埃火明懷人今忽到握手莫為情

昔別黃花後歸來未歷秋形容驚忽老詩律喜逾適就我求醇酒

為君惜傲裘欲詢京國事恐促座中愁

悼莊氏小甥女因念亡兒

吾憐小甥女弱質似蘭蕙未瘞金蠶墓曾投玉燕釵兒亡兩姓悼

汝去再生諧無復他家聘吹簫愴我懷

夜坐

把卷西窗夜秋懷集百端蛩聲階畔急螢影案頭乾帶緩憐予病

衣輕覺婦寒高堂猶自織欲臥諒難安

王師

王師雪夜駐聞道向蓬山千里旌旗素三軍鬢髮斑光添銀畫戟

寒並玉門關不識歌楊柳何時振旅還

春詠同庸菴風山雲孫訃士和瑯琊作

雲

片影明於水悠然漾遠空光華宜傍日舒卷不因風漫落清江上

微勻碧樹中相看渾欲暮獨覺意融融

池

方塘春水濫寸寸數游鱗影入花偏好機忘鳥自親誰家猶濯錦

吾意欲垂綸一夜東風起浮萍惱殺人

梨花

為想臨風意含嬌迴自殊濛濛深引蝶閃閃細縈珠野望雲縹緲

宵看月有無賞心桃李外春酒及時沽

鴨

菽稗慙家食終難混野鳧飛飛偏未遠泛泛幸非孤無事還長數

知名任自呼一泓春漲暖喜看浴新雛

燕

目見翻飛燕凌風羽並舒驚穿花隙驟斜掠水紋虛細語多憐慰
閒情轉拮据年年春社到猶似愛吾廬

筍

森森堂下筍轉眼出塵姿怒勢因雷感清陰待露滋椒辛聊薦味
棘刺且添籬豫想扶疏後開軒臥對時

草

關情餘寸草掩藹望中多輒趁平原馬輕分淺色螺西堂欣入夢
南浦悵經過欲報春暉未青青奈爾何

鞦韆

握索誰家戲踟躕舞不休身輕疑掌上靨笑出牆頭羽袖舒仍卷
雲駟去復留看時鞭每墮曾記少年遊

羔

細草茸茸輒眠時姿意驕未堪乘入市那解畏然骨抵角憐渠短
麾肱任我招江南春氣早幸不續霜貂

蝴蝶

飄飄頻灑翅舞罷粉偏堆花底餐還宿風前去復迴逍遙莊子意
轉薄魏收才卷幔閒看久流鸞隔院來

黃鶯

一聲何覲皖幾箇更分明翠管調簧漫金梭織柳輕好風還遠度
麗日況初晴試問皇洲上誰將斗酒傾

牡丹

看盡羣芳後方知此絕倫霞光含吐足日氣展舒勻西子真傾國
陳王迴出塵容暉都彷彿難忘洛陽春

過小瞻姪別業同仲震漫題二首

詠懷何處適小阮竹林逢覓徑花偏暗藏鶯葉正穠壁閒山渺渺
絃上水淙淙能琴善畫更有高人共臨池染翰濃

試問東陵地何人尙種瓜行藏甘老圃去住任浮槎每過詩常得
同遊興轉賒留連三徑好偏喜接吾家

過莊司李陳渡村園三首

舊識城南路重來徑似移平疇蹋水近小港進船遲犬吠驚花刺

鶯啼挂柳絲先生高臥處遙傍酒家旗

鵝鴨原無擾雙開白板扉水周堂後閣風卷桁閒衣客到兒童喜

人閒翰墨希殷勤爲黍進相對好忘機

爲問歸來後樓遲又幾年秣田聊自種桃簞也安眠小婦能知禮

諸孫盡象賢天涯二子在游宦轉相憐

初舉儒兒八首

定得生兒否中庭步幾回聞啼猶展轉見說遂趨來昨夢還重憶

年庚與速推老親扶病看今日始顏開

辛苦高堂意衰年屬望殷憐子遲捧檄待爾早貽芹貧復爲兒費

勞翻代婦分此情渾莫報況念昔恩勤

兒時還在眼抱子已中年歲月吾私有箕裘父昔傳不才慚繼續

問起待承先止賴貽謀遠猶堪望汝賢

爾祖如還在掀髯樂可知見憐應勝我入抱總呼兒苦負舍館望

空留與研思今看湯餅薦喜極淚偏滋

每苦征求急愁來鬢欲絲卻因今日事翻動百年思世變終安定

吾生適亂離有兒遲亦得全見太平時

家貧書尙在捻賣價偏輕把卷愁常廢開函恨未平縹箱憐舊業

脈望厭餘生今日爲兒計丹鉛擬續成

每愛通家子從遊振羽翰黃童能擅譽

子其癡慧兒難必追隨我亦歡他年持杖過老友好同看

操犁吾計決名汝日牽牛舐犢應難免文犧幸勿憂千鈞材自健

二頃計全優莫說麒麟降深期鹿豕遊

病中喜賡明北歸過舍小集同諸子席上有贈分得十四鹽二首

壯遊原意氣別恨奈江淹與爾升沈異同人慰藉兼銜杯忘病肺

得句欲掀髯轉為銷魂久相看喜更添
留君君更住小飲復厭厭藉草雲三徑停樽月一簾故交猶有戀
粗糲幸無嫌陶母辛勤意相應為孝廉

秋夜口占示內三首

倦來貪布被轉側復淒淒驟雨秋砧散嚴城夜柝齊苦愁緣母病
欲寐更兒啼旋益經心事躊躇向老妻

吾生誠落拓得醉且忘饑事大終難委門衰苦欲持先公猶負券

負通政冀公金三弱弟已婚期別有關心切言愁爾不知

百年殊易老今始得牽牛儒兒小名稍喜高堂慰差忘末路愁吾才能

病肺兒大任蓬頭會有親朋集明朝典做裘

寄書與章湘御到日已亡二首

彷彿滄浪水亭邊夜月虛生平偏憶爾消息竟愁予斷雁羣堪惜

飛花恨有餘故人多少話不報一行書

昨歲梁溪道恩恩最愴神一樽情未畢十載事空陳漸覺知音少

難禁下淚頻向憐交未密佳傳屬他人湘御亡後一日見夢於錢宮聲託以作傳云密友無

者如子

同兩弟過五兄茶山莊十首

吾兄耕釣處童穉憶曾遊三徑臨池曲雙扉對壘幽重看應彷彿

欲過每遲留姜被閒常說追隨興頗稠

屢有看花約兄書昨更邀教兒頻促駕挈弟遂連鑣刺水秧搖浪

拖鶯柳拂橋來時風物好益覺路非遙

茅堂殊結構一到幾回看葵覆當階錦雲生入戶巒又魚乘溜急

打麥趁泥乾早識漁佃樂多時賦考槃

谷隱真堪羨家風更獨推魯魚兒解辨菰米嫂親炊機畔猶餘絹

園中好下帷鹿車時共載高士復為誰

質朴家人禮優游此日情把書移木榻畫紙當楸枰酒數何勞勸

朋來不用迎親知俱健在閒話適平生時奚老喜聞余至即過

螺杯陽羨得聞出相公家七貴曾同把千秋亦有涯當筵仍的爍

入手倍咨嗟試問前朝事何如晉永嘉
酒醒新沐後步履過風潭樹影遊魚入荷香睡鴨酣遠溪宜置屋
放艇好迴驂儻築山中墅須教傍舍南

倭絨花更好秋夏九番開名以傳聞異占因節候催稻田知早熟
樽酒約重來他日郊居後移根也自栽倭絨俗名阿濃又名阿那其花九開九落則稻熟

冠蓋吾家盛馳驅幾息肩幽棲都未遂存沒總堪憐難得匏樽聚
須教雁羽聯雙橋猶滯客翹首暮雲天時三兄客敬亭未歸

歸途青未了前夜雨滂沱菱港連粳秫松陰潤薜蘿望中先壠樹
行處薄田禾應得攜諸弟頻頻向此過

夜坐竹閒有感

偶來泉石畔落落對瑯玕直節誰無愧幽姿自可餐星從分野算
月似隔簾看坐久忘歸興絺衣未覺寒

為其年詠杯

漫道此銷愁常將綠蟻浮叵羅敲易盡鑿落漏難收書就膠西傳

名同江夏洲緬思遺澤在入手淚先流

其年尊公多著書幾遭禍衡之禍故後半及之

贈岳生襄明

應知吾道重似與眾人殊忠孝懷先烈文章學大儒才多還蘊藉
年少只斯須於爾相期厚何論早棄繻

舅氏吳任菴向理延平因議出周櫟園先生罷職擬戍會櫟園荷
先皇親訊感召天變事遂得白舅今亦邀恩復官索詩有贈

當日矜疑意原符 聖主心片言吾道直三宥國恩深舊下烏號
淚新傳鳳闕音重看簪紱在矢報更從今

嚴顯亭都諫假歸為母江太夫人壽索詩有贈兼寄示方貽翰林

四首

出入承明久 君恩暫許歸趨朝心自切將母意無違諫草堂前

誦斑衣膝下輝顯揚真已遂誰不念芳徽

當日嚴夫子人倫海內師同心欣有助匹德頌無儀丸膽嘗猶苦

含飴哺更慈聯翩今在眼并慰昔賢思

試向高堂望諸孫盡國珍劣猶稱虎豹瑞乃得麒麟累代瑤華詔
千秋玉帛身況當娛子祿不藉報劉人
從此稱觴進相將百歲餘日邊人補衮花下母乘輿國史傳徽懿
天言問起居知交叨兩世長得拜階除
寄題吳園次半草亭

知君開別業三徑自蕭條日暖春垂柳風清夜聽簫高齋詩入選
俠客酒相邀何日攜枚乘同觀八月潮

夜泊

塗路正漫漫羈愁強欲寬月浮千嶂出雲擁萬松寒夾岸帆初落
橫參夜向闌問誰臨水住猶自卷簾看

舟過天門山

天門終古峙湍水更飛濤兩岸隨煙沒諸峯傍日高乘秋銀榜發
入暮酒徒豪誰擊中流楫迴風冷戰袍
客寓荆溪社集三日仍赴飲王彤生妓席分得二冬

風雨蛟橋夜青樽又過從主人王逸少座客蔡興宗催棹黃頭急
彈箏素手慵不知沈醉後何處響銅龍

席上分賦得鬻妃女脣

黃門承旨罷宮殿月初高斷袂邀新寵聞環識內曹暗香含荳蔻
微液溼櫻桃一自同私語難忘金錯刀

贈王將軍

早歲平關隴朱鏡奏凱歌旌旗晨出塞風雪夜提戈白日飛烏鵲
明珠載橐駝何須夾轂問家世本三河

無錫縣城樓望月

俯向東溪望層城問月華漸看臨雉堞迴顧失山霞樹覺流光溼
村知遠郭斜偏憐同一照百里即天涯

夏日吳伯成先生招讌出江南詞見示歸寓有作二首

茂宰聲名久三年願託交欣逢河朔飲幸免汝南嘲曲好還頻顧
詩成復漫敲醉歸風送月已過綠楊梢

客舍窗臨北桃笙臥頗宜欲尋天際想還憶座中詩好景江南足
輕裝越嶠遲遠行愁躑躅萬一使君知時欲遊聞

客舍贈龔天衢表弟

兄弟平生誼年來聚會難翻因同作客常得共為歡往事纏綿話

新詩次第看連宵忘肺病為爾一加餐
八鐙詠同吳伯成先生徐莘叟諸六在年伯及姜西銘趙山子願

修遠天石泰留仙毛卓人分賦

客鐙

黯黯孤檠在由來照獨愁光陰同是寄形影暫相留映壁侵長劍
窺囊笑傲裘那堪鄉夢醒明滅五更頭

舟鐙

豈是然犀渚溶溶水殿寒九微明畫浪千炬障冰紈綵鷁飛猶見
沈魚夢未安遙光波上下直作夜珠看

山鐙

燎原非野燒閃爍遍峯巔星影爭搖落龍光倏變遷散時金炬列
簇處火珠聯直訝千巖秀都開太華蓮

佛鐙

慧光原普照一室見初心不滅全無夜相傳直至今月來逾寂寂
僧定覺沈沈前路明如許更殘好自尋

花鐙

巧鏡春葩豔繁紅掩映宜同邀明月伴各怯暗風吹煖熨將開蕊
輕懸欲墜枝芳魂難睡足應使蝶蜂疑

閨鐙

綺戶蘭膏注熒熒祇自青移來簾幌漾剔去剪刀停數穗愁難寐
占花喜復醒芙蓉清漏永為爾徹宵聽

雪鐙

本出兒童戲炎涼尚未分縱教中漸熱不至勢如焚刻玉玲瓏影
含珠嫩澹紋茶鐙吾亦煮虛照恐輸君

書燈

一生長對爾慘澹舊帷中晷盡編還續花生筆競工尙堪分織錦
曾及照丸熊顧影看兒在薪傳幸未窮

正誼堂詩集五律之二

正誼堂詩集

七言律一

江寧賦歸適張修崖招飲不赴

曾醉秦淮舊酒樓卻憐今日此重遊南朝花月留宮體東第衣冠
動客愁苜蓿秋高羣牧馬魚龍夜靜一歸舟貽書好謝張公子相
對樽前淚恐流

揚州

春潮欲上廣陵城有客扁舟夜渡輕玉管千家橋畔聽珠簾十里
月中明漫看新柳憐隋苑誰向空帷問董生回首昔年行樂處隔
江雲樹動人情

送萬考叔

聞道天涯尙戰爭橫江烽火照懸旌故鄉君望黃陵廟去路余鄰
白帝城旅食愈知麤糲好才名總爲亂離輕只今分手誰同調錦
樹丹楓萬里情

將往襄陽道中送同鄉歸里

登山臨水思紛紛況復當筵此送君大道銅鞮千里月故園金谷萬重雲孤鴻知向誰家落折柳偏從古驛聞歸去儻逢親友問爲言王粲欲從軍

登大別山晴川樓

晴川樓外正春明萬里山河一望平日落衡陽迴雁早天連湘水暮雲輕歸帆遠映桃花樹隔岸微聞玉笛聲東望故鄉何處是忽看明月不勝情

別楚中沈漸卿鄭友吉古非博譚韶成諸子時余擬往臨洮

諸君袞袞擅風流此日樽前送遠游海內交情看別淚郢中歌調促離愁秋風零落芙蓉劍明月蕭條玳瑁樓蹤跡年來還未定相思天盡海西頭

赤壁山前赴張使君舟宴

使君千騎下長安水驛相逢盡卸鞍銀榜江中開妓席玉釵燈下

挂臣冠風流最是思公瑾慷慨還教說子桓無那天南孤客意月明江上不勝寒

劉瑞公介公招同孫嘉客徐原一共集遲陳曉江不至

孝標兄弟俊才多有客論文酌巨羅珠樹垂陰藏綺閣楸枰落子雜嬌歌酒酣會聽蘇門嘯榻下原因孺子過明月依人歸未肯儻逢驚座更如何

江寧與徐子晉

氏鴉唳過景陽空風雨龍潭一望中我聽軍聲思塞北爾傳宮體徧江東窮時賓客情偏重亂後文章調每同歸去不堪添別恨冶亭猶自駐青驄

訪康小范秦淮客邸值其公車未歸

康生別後幾經秋聞道年來正倦遊邀笛未逢朱雀里上書仍敝黑貂裘春來月色誰同看客裏風塵我亦愁莫道他鄉隨處醉簫聲只在舊秦樓

自注小范娶于江寧

贈梁溪王某

珠袍公子慣風流，傳粉熏衣坐上頭。三尺珊瑚騎石尉，雙環玳瑁寄秦樓。響從簾內釵，應墜燭滅堂前客。尙留昨夜吟鞭，何處過一時爭喚富平侯。

送朱子葆之大梁兼寄侯朝宗

來時風雨去恁恁，知爾今朝別恨同一榻。燈前驚白雁，孤舟江上度青楓。花飛鄴苑詩，應擅雪滿梁園賦。自工儻過侯生，還寄語故人腸斷暮雲中。

姜匪思御史同孫嘉客章含可沈元白何元音徐武靜暑中過集忽聞松徑有鳴珂，更得諸君枉駕過。繡袞乘驄威望重，珠槃繫組賦材多。一時讌會同河朔，千載人文記永和。沈醉頓教忘出處，當筵誰復怨蹉跎。

七夕留孫嘉客小飲

銀河脈脈露華深，乞巧筵前酒共斟。天上此宵停織錦，人間何處

不穿鍼。秋高太白天逾迥，月照流黃夜未沈。知爾西陵歸思切，好乘油壁結同心。

同徐原一并江北諸公赴鄧元昭太史園亭社集

金陵古縣月初斜，金谷名園擬石家。歌舞風流多暇日，賓朋落拓泛流霞。論詩自愧徐常侍，早宦誰如鄧仲華。每聽軍聲愁思起，倚聲偏自弄琵琶。

譙集顧水部見山先生署中同章武謀茅旦弋

雲間人物共翩翩，況是風流顧彥先。旅客來傾金谷酒，官廚不用水衡錢。座聽桃葉歌，偏緩人對荷花語。更妍今夕太平江，左宴休教感栗亂鷗絃。自注署前有荷花十數畝

泊舟燕子磯同徐公肅

落日高寒照石頭，荒陵終古暮雲愁。山圍天半孤城壘，人在蘆中一葉舟。醉聽江濤同起舞，臥看牛女各悲秋。卻憐鐵縷空圍鎖，燕子翻飛早自由。磯外向占燕王不臣故明初置鐵縷

席上贈妓同林茂之陳善伯鄒訃士陳其年限韻

約腕金環約指銀殷勤留取寄東鄰閒看綠黛遙分蜀細聽青箏
本出秦柳曲乍逢情放誕藥欄小雨話酸辛春衫莫怪頻沾酒羅
袖時時欲拂人

送丁孝廉景呂還南昌

相逢有榻下南州又送河梁古渡頭桑落酒傾名士涕木蘭舟去
美人愁霜天銀雁千山冷夜月金笳萬里秋行路於今真不易儻
逢香草莫遲留

贈樵關馮戶部

戶曹都尉上頭居我向關門偶曳裾官舫千帆雲外落吳城一片
月中虛青樽漫倒秋生鬢紫氣遙瞻夜著書爭似君家彈鋏客歸
來依舊出無車

蘆墅別業

木落秋高山翠微數椽茅屋對漁磯蓼花低向菱塘照楓葉初驚

雁羽飛堊老壺樽憐病客家人刀尺寄寒衣誰將消息空傳說飲
盡滹沱戰馬肥

江寧奉呈張給諫綠雪公

北望燕山旅雁飛清風猶拂侍臣衣多愁平子偏工賦垂老黃門
本畏譏六代草生宮闕改五湖人去姓名非賜環恐有君恩重
未許先生臥釣磯

贈劉員外

使君射策鳳凰城十載爲郎舊擅名南國人文推孝綽西京章奏
重更生積薪仕路誰居上如水臣心爾較清昨夜芰荷香滿處畫
簾虛映月華明

贈平涼董將軍

聞道將軍保障優功成未拜冠軍侯壯心猶向藍田射暇日閒披
白袷遊三徑松風邀客醉一時車馬爲君留相攜重說南征事慷
慨樽前我亦愁

會葬劉訥韋先生三首

魯殿巍然竟已非
南天嘯瘴鷓鴣飛
魂消梅嶺新傳檄
淚落蘭臺舊賜衣
終古揮絃悲叔夜
當年折柬賴元暉
傷心欲就招魂賦
城郭蒼茫去不歸

不因老去怨蹉跎
自是愁聽薤露歌
十載爲郎居粉署
三秋奉使到牂牁
仲宣仕魏才名著
孝穆辭梁宦績多
卻憶前年長至節
貂蟬擁火正鳴珂

孔李通家情奈何
芙蓉舊第復經過
絳紗歌舞牙籌散
朱雀風流玉樹多
欲向東園藏祕器
難瞻北極問明河
可憐庭院花開落
依舊春光照綺羅

示陳賡明

今宵高會儼羣仙
驚坐如君更少年
舊索孟嘉原小異
重思公瑾越相憐
三秋月好宜同醉
百尺樓高任獨眠
不道巴人工度曲
來聽白雪竟紛然

贈華子瞻尊君

雅望曾聞說子魚
膝前嬌舞越羅裾
銅駝淚盡人揮塵
玉樹風多客下車
愛我高吟思舊賦
呼兒珍重絕交書
十年世事樽中盡
何處桃源尙可居

留贈賈明府

七載分符漢水旁
賈生才調本飛揚
只今北望書難上
何日西行路更長
紫塞駝驕夜月青
城畫角起秋霜
相逢樽酒忽忽醉
我亦還家恨渺茫

遇天來伯奉使至安陸

交龍遙映漢江沱
春滿佳城使者過
山出五雲飄御札
花開百里照鳴珂
雄風更向臺前賦
白雪猶聞郢上歌
每戀君恩瞻北極
故園南望卻如何

道中呈天來伯

十年蓬鬢客天涯
千里相逢莫問家
人涉亂離才更老
官經遷謫

望逾加納言正典絲綸命奉使新乘漢水槎父老依然扶杖泣觀風何以奉京華

飲家天錫安陸幕府

將軍千騎射雕回余亦從軍家譙開細柳高笳雲外落長楊新賦曲中裁錦衣舞劍疑排座紅袖彈箏促舉杯帷幄豈無成算在風流漫說羽林才

酬鄒汾亭山右見懷三首

三晉雲山處處過蒯緱彈罷幾悲歌峯開玉女秋乘障月落金榆夜渡河客況不愁風物少交情翻爲別離多如今江左承平久莫望天涯喚奈何

入市吹簫一酒杯十年漂泊孝廉才定知客況渾無藉便到窮途肯賦哀家本談天開稷館心搖落日望燕臺蓮花萬仞飛鴻過何處空傳歸去來

交游無地不心傾況復傳經屬老成塵尾談玄名已藉虎皮講易

望非輕躡珠莫羨三千客抱璧終償十五城車騎南歸應建節只今東閣重儒生

蔣馭鹿客遊江西歸奉母壽道中有遙祝詩因與同人各和原韻以贈

三徑重看菴畫微家園盍慮別來非餐加游子歸時飯綵曳高堂夢裏衣捧檄行看增色笑倚閭初得慰調饑他年恐卻潯陽鮓此日先將獻北闈

江陰赴戚价人讌集

袞袞諸君公讌才一時子亦聚蘭臺梨花舞曲梁閒繞楊柳軍聲江上哀月落高筵銀燭短風侵大海軸轡迴書生抵掌談兵事此夕疑傾袁紹杯

劉起文招同諸君社集

劉郎邀客夜開樽疇昔心期欲共論高會詩壇諸子健舊文劍客幾人存曲翻扇底遊魚聽月照江頭飲馬渾莫倚清談耽酒戰借

看歌舞便銷魂

酬陳陟修

愁多何事寄琅玕欲報曾無綺一端把酒風前君不見懷人雪夜
夢猶寒深嗟往事揮如意漫避浮名託釣竿聞道孟公還意氣秋
來車馬向長安

寄陳曉江

江南春草又青青愁絕題詩遍草亭不信長貧非是病最憐沈醉
已旋醒生前駿足由來賤爨後桐音漫獨聽忽憶故人同調久夜
深風雨欲揚舲

和王研存先生幼子入塾韻

芙蓉清水逼豐胡父客爭將小友呼鑄就雞碑文似錦裁成鳳綵
蠟爲珠並驅驃騎曾何愧若較中郎定不殊莫道橫行須老驥天
閑原自重名駒
觀徐氏伎樂後贈史筠函儲友三

相逢猶是舊羊何握手方期製薜蘿有約漫尋金谷飲無心偶傍
玉臺過詩經失意頽唐久人到中年感慨多卻憶當初丸髻小月
明常對謝樓歌

荆溪讌集賦呈諸公

停杯忽憶十年前吾與羣公盡少年此後風塵多聚散只今歌舞
漫流連故人半在青雲上失意仍歌白石邊猶喜左徒多弟子景
差唐勒劇相憐

時彬友集生緯文
渭公天玉俱集

與陳生彬友

猗蘭操罷正徘徊有爾登堂更舉杯青眼猶然爭欲殺黃金不信
散還來曹劉方駕堪馳譽絳灌無文合忌才此日西風吹正急誰
能獨上最高臺

送陳生集生

絳帷高卷揖諸賢念爾從遊更有年海內英豪爭識面袖中詩卷
幾成編參差月旦知誰是落拓風塵祇自憐歸去莫愁家四壁誤

人多為洛陽田

贈曹生渭公

風流文采屬曹生一代才堪賦帝京早晚定酬知己望輕肥不逐少年行鄴中賓客憐予在關內聲名藉爾成縱到窮途還共慰莫聞長笛便傷心

喜陳生汝礪從遊

家世聲名滿鳳墀君今才調更多奇草生堂上兄曾夢易在牀頭

叔不癡

汝礪為大來殿撰幼子吾友惠育弟其年叔也

已會珠槃推狎主還來絳帳漫稱

師南朝子弟多輕薄誰似華堂玉樹枝

宜興九日登高

日日悲秋強欲寬正逢佳節此盤桓烽侵汎里連漁火水濛孤城擁彈丸回首終憐親舍隔憑高更覺客衣寒籬邊花事隨遲暮便有茱萸不忍看

下玄文過毘陵寓吳氏水閣因次梅邨先生韻四首

十二樓邊舞燕斜曾無玉鏡報秦嘉芙蓉東府逢秋夕松柏西陵記妾家復帳涼多虛夢蝶曲屏風暖靜看花休教鎮日垂銀蒜恐有狂夫駐寶車

橫塘秋水澹芙蓉月下聞環正步虛蘇蕙機中空織錦麻姑江上欲傳書應憐紅粉偏多恨便有青琴總不如昨夜風高明月冷神仙亦自怨樓居

畫堂燕子正初雛荔子紅衫映雪膚細語淺斟銀鑿落迎涼閒賭玉樽蒲闥中筆陣留書禮鏡裏眉峯是畫圖縱有篴篥聽不得青溪愁絕蔣家姑

吹簫猶與說乘鸞長夜神弦強自彈漢女弄珠終有贈吳剛伐桂不知寒一鉤羅韞淩波見七月銀河到曉看試問珠簾深苑裏只今何處倚闌干

香奩體同訂士雲孫和王阮亭原韻十二首

生小藏嬌白玉扉牆頭馬上見應稀春寒珍重加窮袴日暖遲回

換溽衣頰際桃花常欲笑
時燕子舊相依銅街輕薄知多少
那得尋常近紫幃

一聲何處學梁鶯驚起游魚落雁行
嗽玉脣乾櫻乍破彈箏甲卸
筍原長新梳鬪掃鬢宜墮慣著方空體自涼
誰到後堂還不避道
書終日對明妝

芬芳楚畹露華滋人似空山未采時
花有低昂原並蒂離分內外
本連枝一牀翠管臨王帖半局楸枰
下女棋當日研羅裙子上
嘯痕只有養娘知

秦珠一琲值三千卻聘心情事可憐
難使羿妃長入月忍教吳女
竟爲煙相思願委枯河畔薄倖羞過
明鏡前目望銅輿天上去照
人偏恨月娟娟

愁多最苦夕陽遲秋夜雖長有夢時
小葉煎殘芳艾納落花吹掩
細采恩欲添畫汁眉偏聚懶戲藏鈎
手鎮垂便到綠熊重席上不
曾安穩枕紅氍

由來名士悅傾城況復西軒曲更清
每過玉臺留一醉還將金屋
訂三生避人欲語頻回顧送客無言
最愴神歸聽汝南雞再唱誰
家樓館尙吹笙

烏龍橫臥近樓居鸚鵡聲聲欲詈予
怯重翻迷歸去路疑多頻憶
寄來書犀簾幌動移鐙後銀翦聲停
卸髻初暗想程姬應有避未
傳消息定何如

麝火微昏一徑通依稀猶認石欄東
扶來小袖銀泥白話到遺簪
玉筍紅漫飲菜莢沈醉後翻憐蝴蝶
夢魂中熏香依舊空歸去枉
自更殘逐曉鴻

金梭欲織又還收怕聽閒人話女牛
巴錦裁裙虧半束鸞箋寫字
學雙鉤妝成坐惜芙蓉晚賦就行悲
紈扇秋欲上朱樓人不見鮫
珠常向唾盂流

朝來擁髻訴分離正值香風撲面吹
六出匳前描柳汁四條絃上
拂蛛絲分杯每出仙人掌鬪葉常燒
懶婦脂只此歡娛消肺病神

君何必見靈祠

花徑朱欄曲曲遊園亭應說小瀛洲櫻桃照日偏開暈楊柳禁風
自放愁筆陣攜來青玉几笛聲吹下綠珠樓無端侍女傳私語脈
脈情懷似晚秋

欲訪仙家路未遙斜通流水對藍橋十年曉漏情猶在一夜春風
恨已消織女機絲留線井麻姑書信達江湖從今自著凌虛躡肯
向章臺再逞腰

觀荆溪徐氏女樂

玉臺何必更裝書綺麗人稱南路徐舞動柘枝隨月墮歌翻蓮葉
繞梁虛憐才獨許胡牀近顧誤因看蜀黛舒聞道青陵今已築可
能不共鳳凰居

過江陰韓氏園適查東山攜女樂寓居同和原韻四首

臺榭參差一畫圖古梅千幹綠雲扶賓朋共賦梁園雪兄弟雙誇
秦氏珠旨三尊觸目庭躋新玉樹苞九聖符感懷詩憶舊金吾旨三尊人原韻朝

來添得東山屐絲竹淹留興未孤

青山排闥總堪圖與客登樓醉欲扶地是江皋應解珮園名金谷
好藏珠風流猶自推遺老放誕旋憐失故吾一曲高歌渾欲和肯
教白雪調偏孤

舞倦誰猶繡蝶圖游時常倩藥欄扶音傳密樹還停鳥鬢壓卑枝
恐墜珠東閣佳人張靜婉南朝才子庾肩吾相看漫有狂言發立
盡斜陽影自孤

夢後難成蛺蝶圖花花葉葉自交扶酒情爛熳隨春絮詩興留連
待夜珠捉鼻漫傾天下士掀髯卻憶鏡中吾紅泉碧樹歌聲歇風
雨江城一棹孤

正誼堂七律

詩寄大德以野野天門上
詩寄大德以野野天門上
詩寄大德以野野天門上

詩寄大德以野野天門上
詩寄大德以野野天門上
詩寄大德以野野天門上

詩寄大德以野野天門上
詩寄大德以野野天門上
詩寄大德以野野天門上

正誼堂詩集七律之一

